

Xojon carta-la San Pablo xi kiskiì ítjòn-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

¹ 'An xi 'mì-na Pablo, xi xó k'oas'ín kinokjoà-na nga 'an tsibíxáya-na Cristo Jesús, nga k'oas'ín kjòmejèn-là Nainá. Títsanihixat'aà-nòjen kò Sóstenes xi 'ndseé chibá ít'aà ts'e Cristo. ² Tikjiì-nò xojon carta jè, jñò xi naxandá-là Cristo maà xi títsajnaà ján Corinto, xi jye kisitsjeè-nò Nainá nga ya títsakjoòkoo Cristo Jesús nga xó k'oas'ín jaàjiìn-nò Nainá mé-ne nga xita tsjeè-là komaà kò ngats'ìi xita xi xki xi ján chjat'aà-là nga jeya síkíjna jè Na'èn-ná Jesucristo xi otíxoma-ná, tikoà jè otíxoma-là xita koi. Xi Na'èn-ná 'mì-lá, tikoà Na'èn-ná tsò-là jñà xita koi. ³ Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijììn inima-nò.

'Én xi kiichja Pablo nga tsjá-là kjondaà Nainá

⁴ Kjit'aà nàchrjein tsjaà-là kjondaà Nainá xi ít'aà tsajòn koi kjoa-là jñà kjondaà xi kitsjaà-nò Nainá nga ndaà kisìchikon-t'in-nò ít'aà ts'e Cristo Jesús. ⁵ Nga yaá ít'aà ts'e Cristo, Nainá kisìchikon-t'in yije kjohítsjeèn-là inima-nò, kós'ín nokjoà, kò kós'ín machiya-nò 'én-là Nainá. ⁶ Nga k'oaa s'ín 'ya-là, nga jè 'én ndaà-là Nainá xi kjoa ts'e Cristo kjòkixiyaá ijììn inima-nò. ⁷ Nímé kjotjò-là Nainá

chijat'aà-nò k'e nga tákó titsachiñá-là nga kjoíi ìjngoò k'a Jesucristo xi otíxoma-ná. ⁸ Nainá tsjá-nò nga'ñó skanda k'e nga kjoehet'aà nachrjein, mé-ne nga nímé jé sakòt'aà-nò k'e nga kitjojen ìjngoò k'a Jesucristo xi otíxoma-ná. ⁹ Nainá xita kixi-né, síkitasòn-né koni s'ín tsjá 'én-la. Xó k'oaá s'ín kiichja-nò nga ya chraña kitsajnakjoòko Jesucristo xi ki'ndí-la tsò-la nga jè otíxoma-ná.

Mé-ne kjòjòya-ne naxandá-la Cristo ján Corinto

¹⁰ Ndí 'ndsè kò tichjaá, it'aà ts'e okixi xi kitsjaà-na Jesucristo xi otíxoma-ná, tìbitsi'bà-nò ngats'ioò, ngàsòn ngáya titsajnakoo xinguioo, mé-ne nga mì kojòya-ne kjohítsjeèn-nò. Tajngoò kjohítsjeèn tikjeén, ngàsòn jchósòn-là nità mé kjoa-ne. ¹¹ Koií koxan-nò ndí 'ndsè, nga jñà xita ni'ya-la Cloé, tsibénojmí-na nga kjoasiì tjín-nò. ¹² Koií k'oas'ín tìxan-nò, tjín i'nga xita xinguiaá xi tsò: “An, jé Pablo fit'aà-la.” Tjín xi tsò: “An, jè Apolos fit'aà-la.” Tjín xi tsò: “An, jè Cefas [xi tikoá Pedro 'mì] fit'aà-la.” Tjín xi tsò: “An, jè Cristo fit'aà-la.” ¿Mé-ne obixón-nò? ¹³ ¿A kjìn ya ma-ne Cristo? ¡Majìn! ¿A jè Pablo xi kisit'aà krò it'aà tsajòn? ¡Majìn! ¿A it'aà ts'eé Pablo komà bautizar? ¡Majìn! ¹⁴ Ndaà chjí-la Nainá, 'an, mìtsà yá xita kis'iaàn bautizar ya naxandá tsajòn, ta jè Crispo kò Gayo, ¹⁵ mé-ne nga mì yá xita kitso-ne: “It'aà ts'eé Pablo komà bautizar.” ¹⁶ Saá tíbítsjeèn-na nga tikoá kis'iaàn bautizar Estéfanos kò xita xíkjín, tanga mìkìl bítjsjeèn-na tsà kis'iaàn bautizar xi kjejí xita. ¹⁷ Jè Cristo mìtsà koi xá kisikasén-na nga xita s'iaàn bautizar; koií xá kisikasén-na nga 'an kichjàya 'én ndaà-la Nainá. K'e nga chjàya,

mìtsà 'én-la x̄ita ch̄jine s̄ikjeén; majìn-na nga ch̄ija nga'ñó-la krò-la Cristo.

Jè Cristo, nga'ñó-la Nainá-né k̄o k̄joach̄jine-la Nainá-né

¹⁸ J̄ñà 'én xi t̄inokjoáya it'aà ts'e Cristo nga k'en-t'aà krò, ta k̄joa ská ma-la j̄ñà x̄ita xi ya t̄jímaya ndiyá-la i'nde k̄jo'in. Tanga j̄ñà xi jye t̄itsabitjokàj̄ñaá k̄jo'in, k'oaá s'ín mokjeiín-ná nga jè 'én-la Cristo nga'ñó-la Nainá-né. ¹⁹ K'oaá s'ín t̄íchja Xojon-la Nainá nga tsò:

J̄ñà x̄ita xi 'ñó t̄jín-la k̄joa ch̄jine,
'aán kokoò-la nga n̄imé ch̄jì-la k̄joach̄jine-la.
'Aán kochrjeènguia k̄joh̄itsjeèn-la
j̄ñà x̄ita xi 'ñó mach̄iya-la.

²⁰ J̄ñà x̄ita xi 'ñó t̄jín-la k̄joach̄jine, k̄o xi 'ñó ch̄jine xojon k̄o xi joóya-ne k̄joa xi t̄jín isò'nde, i'nde, ¿ñánda t̄ítsajnak̄o k̄joach̄jine-la? Jè Nainá, kisiskáya-la k̄joach̄jine xi t̄jín-la x̄ita isò'nde.

²¹ Nainá 'ñó x̄ita ch̄jine, mìkìl kitsjaà'nde-la x̄ita nga it'aà ts'e k̄joach̄jine-la isò'nde k̄ijtseèxkon. Nainá k'oaá s'ín sasén-la nga ochrjekàj̄iìn k̄jo'in j̄ñà xi mokjeiín-la it'aà ts'e 'én ndaà-la Nainá xi k̄joa ts'e Cristo, 'én xi tsò-la x̄ita koi, k̄joa ská-né.

²² J̄ñà x̄ita judío [mìkìl mokjeiín-la] nga jé xi mejèn-la nga skoe k̄joxkón xi 'ñó jeya t̄jín, k̄o j̄ñà xi mìtsà x̄ita judío [t̄ikoaá mìkìl mokjeiín-la] nga koií ótsji xi 'ñó k̄joa ch̄jine. ²³ Tanga ngajen k'oaá s'ín nokjoàya-jen nga krò k'en-t'aà Cristo [x̄ita xi xó kisikasén-ne Nainá]. J̄ñà x̄ita judío mìkìl mokjeiín-la k̄joa xi komàt'in Cristo, k̄o j̄ñà xi mì x̄ita judío, k̄joa ská ma-la. ²⁴ Tanga j̄ñà x̄ita xi xó jaàj̄iìn-ne Nainá, xi x̄ita judío k̄o xi

mìtsà x̄it̄a judío, k'oaá s'ín mokjeiín-la nga jè Cristo nga'ñó-la Nainá-né k̄o kjoa ch̄jine-la Nainá-né. ²⁵ Kjoa-la Nainá xi ta kjoa ská tsò-la x̄it̄a isò'nde, kjoa ch̄jine-la Nainá-né. Ìsaá tse kjoach̄jine t̄jín-la mì k'oaá-ne koni kjoach̄jine xi t̄jín-la x̄it̄a isò'nde. K̄o jè kjoa-la Nainá xi ta kjoa indaà tsò-la x̄it̄a isò'nde, nga'ñó-la Nainá-né. Ìsaá tse nga'ñó t̄jín-la mì k'oa-ne koni nga'ñó xi t̄jín-la x̄it̄a isò'nde.

²⁶ J̄ñò ndí 'ndsè k̄o ndí tichjaá, t̄ikítsjeèn k'e nga s̄a jaàjiin-nò Nainá, chibaá ma-nò xi x̄it̄a ch̄jine tsò-nò x̄it̄a isò'nde, k̄o chibaá ma-nò xi x̄it̄a ítjòn titsajnaà, t̄ikoa chibaá ma-nò xi ȳa ni'ya-la x̄it̄a sk̄o-la kits'iòn. ²⁷ Tanga Nainá jaàjiin j̄ñà x̄it̄a xi tsò-la x̄it̄a isò'nde nga chiba kjo'hítsjeèn t̄jín-la mé-ne kosobà-la j̄ñà x̄it̄a ch̄jine. T̄ikoa jaàjiin Nainá xi tsò-la x̄it̄a isò'nde nga nimé ch̄jí-la mé-ne kosobà-la j̄ñà x̄it̄a xi x̄it̄a ítjòn t̄ítsajna. ²⁸ Nainá jaàjiin x̄it̄a ima k̄o x̄it̄a xi bitjongui xi tsò-la x̄it̄a isò'nde nga nimé ch̄jí-la, mé-ne kitjongui-ne j̄ñà x̄it̄a xi tsò nga j̄ñà t̄ítsajna ítjòn, ²⁹ mé-ne nijngoò x̄it̄a xi 'nga s̄ikíjna-ne yijo-la nga nguixk̄on Nainá. ³⁰ Tanga t̄ijè-ne Nainá kisikítsajna-k̄o-ná Cristo Jesús. K'oaá t̄is'ín kis'iin nga ít'aà ts'e Cristo sakó-ná jè kjoach̄jine, nga jè Cristo, x̄it̄a kixi s'ín-ná, x̄it̄a tsjeè s'ín-ná k̄o síkítsajna-dejí-ná kjoa ts'e jé-ná. ³¹ Koni s'ín t̄ichja Xojon-la Nainá nga tsò: “Jè xi jeya síkíjna yijo-la, ta saá Nainá jeya k̄atasíkíjna.”

2

¹ Ndí 'ndsè k̄o tichjaá, k'e nga kiikon-nò nga tsibenojmí-nò 'én-la Nainá, mìtsà koi 'én kichjà-nò

xi maxkón-la xita k'e nga 'nchré ko xi tsò-la nga 'én-la xita chjine. ² K'e nga tsohótijnako-nò, k'oaá s'ín kiskoòsòn-la; mìtsà mé kjoa xi kj'eijí kisikítsjeèn; nguì tà 'én-la Jesucristo tsibenojmí-nò, nga jè-né xi krò k'en-t'aà. ³ K'e nga ijchò kènojmi-nò 'én-la Nainá, indaàkjoaá ijchoa. Titsakjoòn-ná skanda tíhotsé-ná. ⁴ K'e nga kichjàyajiìn-nò mìtsà 'én-la xita chjine kisikjeén mé-ne nga kòkjeiìn-nò. Ta saá jè Inima Tsjeè-la Nainá tsakó nga'ño-la nga kòkjeiìn-nò. ⁵ Mé-ne jè kjoa xi mokjeiìn-nò it'aà ts'e Cristo, mìtsà ya nchrobá-ne kjoa chjine-la xita, yaá nchrobá-ne nga'ño-la Nainá.

Xi nguì kjoa chjine, it'aà ts'ée Nainá nchrobá-ne

⁶ Kixijí kjoa 'én chjineé nokjoàya-lajen jña xita xi jye tímajchínga nga mokjeiìn-la it'aà ts'e Cristo. Tanga mìtsà kjoa chjine ts'e isò'nde nokjoàya-jen, ni mìtsà ts'e xita ítjòn xi tjín isò'nde xi jye tíchija nga'ño-la. ⁷ 'Én xi nokjoàya-jen, kjoa chjine ts'e Nainá-né, jè kjoachjine xi tjí'ma-la xi k'oas'ín kiskoòsòn-la skanda tisa kjòtseé nga jña jeya kitsajnaá. ⁸ Nijngò xita ítjòn xi tjín isò'nde kjòchiya-la it'aà ts'e kjoa chjine koi. Tsà kjòchiya-la, mì-là kii k'oas'ín krò kisik'en-t'aà Na'èn-ná Jesucristo xi tjín-la kjoa jeya. ⁹ Xojon-la Nainá, k'oaá s'ín tíchja nga tsò:

Jña xita xi matsjakeè Nainá,
jè tjíndaà-la kjoa xi ni saá jngò xita xi xkon beè-ne,
xi líká-la 'nchré-ne
xi ko inima-la machiya-la.

¹⁰ Nainá, it'aà ts'e Inima Tsjeè-la tsakó-najen kjoa koi. Nga jè Inima Tsjeè-la Nainá ótsjia yije-né

skanda jñà kjoa xi mìkiì ndaà fiya-ná it'aà ts'e Nainá.

¹¹ ¿Yá xita-ne xi machiya-la kó tsò kjohítsjeèn xi tíjìn inima-la xita xi kj'eíí? Tà jè tíjìn inima-la kó tsò kjohítsjeèn-la. K'oaá tís'ín tjin kjoa ts'e Nainá, nijngoò xita tíjìn-la kó tsò kjohítsjeèn-la Nainá; ta jè Inima Tsjeè-la tíjìn-la. ¹² Ngajen, mìtsà jè inima-la xita isò'nde kitjoé-najen. Jè Inima Tsjeè-la Nainá kitjoé-najen, mé-ne nga jcha-najen kjoa xi Nainá kitsjaà kjotjò-ná. ¹³ 'Én koi, k'oaá s'ín nokjoà-jen koni s'ín okóya-najen Inima Tsjeè-la Nainá. Mìtsà kjohítsjeèn ts'e xita isò'nde. 'Én Tsjeè-la Nainá bènøjmí-jen xi kjoa ts'e Inima Tsjeè-la.

¹⁴ Jè xi mìtsà xita-la Cristo, mìkiì machiya-la 'én xi ts'e Inima Tsjeè-la Nainá. Tà kjoa ská ma-la. Mikiì fahas'en-jìin-la, nga mochjeén-né nga it'aà ts'e Inima Tsjeè-la Nainá kinchátsjiyaá. ¹⁵ Tanga jè xita xi Inima Tsjeè-la Nainá tíjnajìn inima-la, maá-la ótsjiya yije nita mé kjoa-ne. Tanga it'aà ts'e xita jè, mì yá xita xi koma-la kohótsjiya kjohítsjeèn-la. ¹⁶ K'oaá s'ín tíchja Xojon-la Nainá nga tsò: “¿Yá-né xi beè kjohítsjeèn-la Nainá? ¿Yá-né xi koma kokóya-la?” Tanga jñá tjin-ná kjohítsjeèn xi ts'e Cristo.

3

Jñà xita xi síxá it'aà ts'e Nainá ján Corinto

¹ Jñò ndí 'ndsè kò tichjaá, mìkiì komà kos'ín kichjàkò-nò koni xita xi ndaà tíjìn inima-la Inima Tsjeè-la Nainá. Ta k'oaá s'ín kichjàkò-nò koni tsà taxki xita isò'nde xi tà kjoa ts'e yijo-la ótsji, koni

tsà tákó ndí ixti xó xi it'aà ts'e Cristo. ² Mìtsà 'in t_jín 'én xi tsakoòya-nò; k'oas'ín ngaya-la koni ndí ixti xó xi sà nchihoki, tà tsjín 'bii, mìtsà tsojmì tájaà kine. Jñò, kj'eè kii ndaà fahas'en-jiin-nò 'én-la Nainá, k'oaá ngaya-la koni tsojmì tájaà xi kj'eè kii ma chine skanda nachrjein i'nde. ³ Tákó k'oaá s'ín 'nè koni s'ín xita xi kjoa ts'e yijo-la ótsji. Machinicha-nò xinguiōo, chitiya-nò nita mé kjoa-ne. Kjoa koi, kjoa ts'e xita isò'nde-né. ⁴ K'e nga bixón: “An, xita ts'e Pablo-ná”, kō jè xi lingoò tsò: “An, xita ts'e Apolos-ná”, jñò, k'oaá s'ín nokjoà koni chja xi taxki xita isò'nde.

⁵ 'An xi Pablo 'mì-na, kō Apolos, tà xita chi'nda-nájen xi nixá-lajen Nainá. It'aà tsajeén kòkjeiín-nò 'én-la Nainá, nga lingoò lingoò-jen ki'nè-jen xá xi Na'èn-ná kisingsja-najen. ⁶ 'Aán tsakoòya-nò 'én-la Nainá, k'oaá ngaya-la koni jngoò xita xi bítje xojmá, jè Apolos kiskinindá-la, tanga jè Nainá tísíjchá. ⁷ Mìtsà jè xita xi bítje tsojmì, nì mìtsà jè xi kinindá-la xi chjí-la, tã jngoò jè Nainá xi síjchá tsojmì xi sitje xi 'ñó chjí-la. ⁸ Jè xi bítje kō xi kinindá-la, ta jngoò xá t_jín-ne xi s'ín. Tanga jè Nainá tsjá-la chjí-la koni t_jín xá xi kis'ìin nga jngoò lingoò. ⁹ Ngajen, yaá taña nixákjoò-jen xá-la Nainá. Koã jñò-nò i'nde ñánda sitje 'én-la Nainá. Tikoáá jñò-nò ni'ya-la Nainá xi ngajen bíndaà-jen. ¹⁰ Koni s'ín t_jín kjondaà-la Nainá xi kitjoé-na, 'an-ná xi chjine chrjó ítjòn, xi tsibijnà tàts'en chrjó-la ni'ya. Kj'eí xitaá bíndaàsòn ni'ya. Tanga jñã xi bíndaàsòn, ndaà kátasíkindã nga jngoò lingoò kós'ín kiiindaà. ¹¹ Mì tì yá xi koma-la kiijna lingoò-isa tàts'en chrjó ni'ya koni jè xi jye t_jina, nga jè Jesucristo t_jina koni

tàts'en chrjó ni'ya. ¹² Tàts'en chrjó ni'ya, komaá sindaàsòn-ne kicha oro, plata, ndajo chjí xi 'ño ndaà kjoàn, nas'ín yá, nas'ín xka paja, o xka ndiji. ¹³ Tanga jñà xá xi s'ín nga jngoò ìjngoò xita, k'ée jcha-la jè nachrjein k'e nga sindaàjìin-la xita. Nachrjein jè, ni'ín kjoíko, koa jè ni'ín skót'aà nga jngoò ìjngoò skaya xá xi komà. ¹⁴ Tsà jngoò xá kichikjoako-la ni'ín xi skót'aà, tjoé-la chjí-la jè xita xi kìindaàsòn. ¹⁵ Tanga tsà jè xá xi kisindaàsòn, tsà kitì, chijaá chjí-la. Tanga jè xita kitjokàjìin kjo'in koni jngoò xita xi bitjokàjìin ni'ín.

¹⁶ Jñò, ¿a mìtsà tíjìin-nò nga ni'ya ingo tsjeè-la Nainá 'mì-nò? Nga jè Inima Tsjeè-la Nainá tíjnajìin-nò. ¹⁷ Tsà yá xita xi mejèn-la sikkits'ón-jìin-la ni'ya tsjeè-la Nainá, Nainá tikoaá sikkits'ón-jìin-la jè xita xi k'oas'ín s'ìin. Nga jè ni'ya-la Nainá, tsjeè-né. Koa jñò-nò xi ni'ya tsjeè-la Nainá 'mì-nò.

¹⁸ Kì yijo-nò chonachan-là, tsà yá xi k'oas'ín síkìtsjeèn nga 'ño tjín-la kjohítsjeèn xi ts'e kjoa chjine-la isò'nde, ta saá kos'ín katas'ín koni tsà tsjìn-la kjohítsjeèn, mé-ne nga nguì xita chjine koma-ne. ¹⁹ Jè kjoa chjine-la xita isò'nde, it'aà ts'e Nainá, kjoa ská tsò-la. Xojon-la Nainá, k'oaá s'ín tíchja nga tsò: “Nainá, k'oaá s'ín s'ín nga jñà xita chjine, tíjñà-ne kjoa maña-la kixojìin-ne.” ²⁰ Jè Xojon-la Nainá, ìjngoò k'a tjít'aà ñánda tsò: “Nainá, beè-né nga nimé chjí-la kjohítsjeèn-la xita xi chjine tsò-la yijo-la.” ²¹ K'oaá ma-ne, jñò, kì njngoò xita xi 'nga níkjna. Nga ngats'ìi xi tjín, kjondaà tsajòn yije-nò. ²² Tsà jè Pablo, tsà jè Apolos, tsà jè Cefas [xi tikoa Pedro 'mì], tsà jè isò'nde, tsà jè kjoabinachon,

tsà jè kjoa biyaà, tsà jè nachrjein i'nde, tsà jè nachrjein xi sa nchrobá, kjondaà tsajòn yije-nò. ²³ Jñò, ts'e Cristo-nò, koa jè Cristo ts'eé Nainá.

4

Xá-la xita xi tsibíxáya-la Jesús

¹ K'oaá s'ín jchatakòn-nájen koni xita chi'nda xi síxá-la Cristo, nga ngajen kjongatsja-jen nga kokóya-jen kjoa tji'ma-la Nainá. ² Jngoò xita xi xá mangatsja, mochjeén-né nga kàta'ya-la nga kixi síkitasòn xá-la. ³ An, mìkiì síkájnoa xi it'aà tsajòn kó tsò kjohítsjeèn-nò, a ndaá tìsíkitasoàn, a xi ch'oó tìsíkitasoàn xá xi 'an kjongatsja, kò kó s'ín síkítsjeèn jñà xitaxá xi bíndaàjìin-la xita isò'nde. Skanda 'an, mì tì kii xan-na tsà ndaà tjín kò tsà ch'oó tjín xá xi tìs'iaàn. ⁴ An, nas'ín k'oas'ín síkítsjeèn nga tsjìn-na jé, tanga mìtsà tsò-ne kjoa nga nguì xita kixi-ná. Nga jè Na'èn-ná xi bíndaàjìin-na. ⁵ K'oaá ma-ne kì tà chjà jé binè-là xinguiòo nga ti kj'eè bijchó nachrjein. Chíña-kjoaa k'e nga kjoí Na'èn-ná xi síhiseèn nga jcha-la kjoa xi tji'ma ñánda nga jñò choòn. Koa sùikatsejèn kó tsò kjohítsjeèn xi tjíjìin inima-la xita. Ikjoàn Nainá jeya sùikíjna koni s'ín nga ok'in-la nga jngoò òjngoò xita.

⁶ Ndí 'ndsè kò tichjaá, koi 'én tichjàkò-nò kjoa xi mangàsòn it'aà ts'an kò it'aà ts'e Apolos xi kjondaà tsajòn mé-ne nga mìkiì síkatonè-là koni tsò 'én-la Nainá. Kì k'oaá s'ín nìkítsjeèn nga jngoò chi'nda-la Nainá isa ndaà nachrjenguioò koni chi'nda xi i'nga. ⁷ Jñò, ¿mé-ne koa bixón-nò nga isa 'ñó chjí-nò koni xita xi i'nga? ¿Mé kjondaà xi tjín-nò xi mìtsà Nainá kitsjaà-nò? Tsà jye kitjoé-nò ngats'iì

kjondaà, ¿mé-ne nga 'nga ma-ne takòn koni tsà ta nga'ño tsajòn kisakò-nò?

⁸ Jñò, k'oaá s'ín machiya-nò koni tsà jyeé ma yije-nò, koni tsà 'ño xita nchiná it'aà ts'e Nainá. K'oaá s'ín nikítsjeèn koni tsà xitaxá ítjòn titsajnaà kò ngajen mìtsà xitaxá titsajna-jen. Ndaà-la tjin tsà kixi kjoa nga otixoma, mé-ne ngajen koma kotixomako-nòjen. ⁹ An, k'oaá s'ín sikítsjeèn, ngajen xi it'aà ts'e Cristo kisixáya-najen, Nainá k'oaá s'ín kiskoòsòn-la nga ngajen-nájen xi fehet'aà-ne, xi tjinè-najen nga kiyá-jen nga nguixkon isò'nde, nga nguixkon xita kò àkjale. Jña xita, tà nchikotsejèn-najen nga tsja ma-la mé kjo'in xi tímat'in-jen. ¹⁰ Ngajen, xi kjoa ts'e Cristo, xita ská 'yatakòn-najen; tanga jñò, it'aà ts'e Cristo, k'oaá s'ín 'ya-nò nga 'ño tjin-nò kjoachjine. Ngajen, k'oaá s'ín 'yatakòn-najen nga xita indaàkjoa-nájen; tanga jñò, xita tájaà-nò. Ngajen, mì yá xita beèxkón-najen; jñò, beèxkón-nò xita. ¹¹ Skanda jè hora jè, kjinchrá-najen, xindá-najen, tsjin-najen nikje xi chikjá-jen, 'ño beetoòn-najen xita, tà tjaàsòn-najen, tsjin-najen ni'ya. ¹² Skanda bijtaá-najen nga 'ño nixá-jen. K'e nga chja'on-ko-nájen xita, ngajen, nijét'aà-lajen Nainá nga katasíchikon-t'in. K'e nga kondra fi-najen xita, chikjoakóo-najen. ¹³ On chjako-najen xita, ngajen ndaà nokjoá-lajen. K'oas'ín beè takòn-najen koni tsà tjé-la isò'nde. Skanda nachrjein i'nde, jña xita k'oaá s'ín beètakòn-najen koni tsojmì xi ningui-ne nga bíxteèn.

¹⁴ Koni s'ín tikjil-nò, mìtsà tìs'iin sobà-nò. Kjo'hítsjeèn titsja jngoò-nò koni tsà ixti ts'an xi

matsjake. ¹⁵ Nas'ín te jmiì ma-ne xi okóya-nò it'aà ts'e Cristo, ta jngò ma-ne xi na'èn-nò. 'An-ná xi komà na'èn-nò nga mokjeiín-nò it'aà ts'e Cristo Jesús nga 'aán tsibenojmí ítjòn-nò 'én ndaà-la Nainá xi kjoa ts'e Cristo. ¹⁶ K'oaá ma-ne bitsi'bà-nò nga k'oas'ín tìjchá yijo-nò koni 'an.

¹⁷ Koií kjoa-la tsìkasén-nò Timoteo, xi ki'ndí-na xan-la nga 'ñó matsjake kò kixi sixá-la Na'èn-ná. Jè sikkítsjeèn-nò kós'ín tìjnakoá Cristo Jesús nga mokjeiín-na it'aà ts'e, koá kós'ín okoòya-la xita naxandá-la Cristo nga kijndà naxandá ñánda bijchoa. ¹⁸ Tjín i'nga xita xinguiò xi 'ñó 'nga chja, k'oaá-là s'ín síkítsjeèn tsà mìkì kjíkon-nò. ¹⁹ Tanga tsà Nainá mejèn-la, kjíkon nìtoón-nò. K'e nga kìjchoa, skoeè jña xita xi 'nga chja, a nga'ñó-la Nainá xi tìn-la a xi tà jè 'én-la xi 'nga chja. ²⁰ K'e nga jè Nainá tíhotíxoma jngò-la xita, mìtsà ta kjoa ts'e 'én mochjeén, kóó nga'ñó-la Nainá mochjeén. ²¹ Jñò, ¿kós'ín mejèn-nò nga kjián? ¿A mejèn-nò nga kjo'in tsjaà-nò k'e nga kìjchokon-nò, a xi mejèn-nò nga kò kjondaà-na kò kjotsja-na kìjchokon-nò?

5

Jé xi kisakò ya ijìin naxandá-la Cristo ján Corinto

¹ Jye na'yà-la nga kjoachijngui tíma jìin tsajòn. Kjoa xi tíma, skanda jña xita xi mìkì beèxkón Nainá, mì k'oaá s'ín. Nga yaá tìjnajìin jngò-nò xita xinguiò xi neajòn-la tsóhoko. ² Jñò, ¿mé-ne 'nga nìkítsajna-nò yijo-nò? Mochjeén-né nga kjoaba kìtsajnajñò, kò jè xita xi kotjín jé tíhotsji, tìnachrjekàjioèn. ³ 'An, kixií kjoa, kjiin tìjna-nò, tanga kjohitsjeèn-la inìma-na yaá tìjnajìin osen-nò.

'An, k'oaá ngaya-la koni tsà ya tijnajiin-nò, jyeé kiskoòsòn-la mé kjo'in xi sinè-la jè xità xi k'oa tjin jé tihótsji. ⁴ Jñò, k'e nga koxkóya nga jeya sikíjna Jesucristo xi otíxoma-ná, jè kjohítsjeèn-la inima-na yaá kijnajiin-nò, tikoá yaá kijnajiin-nò jè nga'ño-la Na'èn-ná Jesucristo. Ko it'aà ts'e Na'èn-ná Jesucristo, ⁵ xità jè, xità neií kàtangatsja yijo-la nga kàtas'e-la kjo'in, ko kàtasíkájno jé-la nga mì tì jé kohótsji-ne mé-ne nga kitjokàjiin-ne kjo'in inima-la, k'e nga kjoíí ìjngoò k'a Jesucristo xi otíxoma-ná.

⁶ Mikiì ndaà tjin nga 'nga nìkítsajna yijo-nò. ¿A mì tíjin-nò nga nas'ín ta chiba na'yo san sísan yije xíkjin na'yo? ⁷ Tinachrjekàjioòn jè xità xi ótsji jé k'oaá ngaya-la koni tsà na'yo san xi mì tì ndaà-ne nga síkíts'ón-nò, mé-ne jñò k'oas'ín kjoàn koma-nò koni na'yo xitse ts'e inchrájin xi tsjin-la na'yo san. Nga jñò, jyeé kitjaàxìn-nò kjoa ts'e jé koni na'yo san jchínga nga jè Cristo k'en ngajo-ná koni jñà orrè xi kisik'en xità Israel k'e nga Paxko. ⁸ Koií kjoa-la jñá, k'oaá s'ín kináchrjeé s'eí nga jyeé kisikítsajnandejí-ná Nainá kjoa ts'e jé, koni s'ín xità Israel k'e nga Paxko nga sítsjeè ni'ya-la nga faáxìn yije na'yo san. Jñá, k'oaá tis'ín chjaàxián kjoa ts'e jé ko kjoa ch'o ko nguì kjoatsjeè ko kjoakixi sikjeén k'oaá ngaya-la koni inchrájin xi tsjin-la na'yo san.

⁹ Jè xojon xi kisikasén ítjòn-nò, k'oaá kixan-nò nga mì ya koahijtakoo jñà xità xi kjoa chijngui s'ín. ¹⁰ K'e nga k'oa kixan-nò, mìtsà jñà kisikaxkia jñà xità isò'nde xi kjoa chijngui s'ín, ko jñà xi tse mejèn-la, ko jñà xità chijé, ko jñà xi xkósòn beèxkón. Xità koi, xki xi ján satíkjoè. Ta jè xi koma kinchat'aàxìn-là tsà xìn isò'nde onguió.

11 Jñà 'én xi kixan-nò, jè-né nga mì ya tsjahijtakoo jñà xi tsò nga xita-la Cristo xi 'ndsè chibá tsà tákó kjoa chijngui nchis'ín, xita xi tse mejèn-la, xi xkósòn beèxkón, xi ch'o chjajno-ná, xi xán 'biì, xi chijé s'ín. Jñà xita xi k'oas'ín s'ín, skanda mìkìl mochjeén nga kichikoo. ¹²⁻¹³ Mitsà jñá oko-ná nga bíndaàjìin-lá jñà xita isò'nde. Jè Nainá kùindaàjìin-la jñà xita koi. Tanga jñò oko-nò nga kíndaàjìin-lá xita naxandá-la Nainá xi tsajòn. K'oaá ma-ne nga xan-nò, chjaàxiòn jè xita xi ch'o tís'ín xi ya tíjnajìin-nò.

6

Kós'ín s'iin jñà xita-la Cristo nga tíjñà xikjín koìindaàjìin-la

¹ Jñò, k'e nga tsà kjoasì tíjn-nò ko xita xinguioo, ¿mé-ne jñà mejèn-nò koìindaàjìin-nò jñà xitaxá xi mìtsà xita-la Cristo? ¿A mìtsà tà jñà kàtindaàjìin-nò xi xita naxandá-la Cristo? ² ¿A mìtsà tíjìin-nò nga jñá xi xita naxandá-la Cristo 'mì-ná, jñá kíndaàjìin-lá xita isò'nde? Tsà jñò koìindaàjìin-lá xita isò'nde, ¿a mì chíkjoa-nò nga ta jñò kíndaàjìin-lá xita xinguioo kjoa xi chiba tíjn? ³ ¿A mìtsà tíjìin-nò nga tíkoa it'aà tsaján kíndaàjìin-lá àkjale? Tsà jñá kíndaàjìin-lá àkjale, ¿a mì koma-ná kíndaàjìin-lá xita xinguiáá kjoa xi tíjn i isò'nde? ⁴ K'oaá ma-ne tsà ta kjoa ts'e isò'nde-né xi tíjn-nò, tìnókjoa jngoò-lá xita 'ndsè xi jñò nachrjenguioò nga 'mì-lá nímé chjí-la, jè kàtindaàjìin-nò. ⁵ Koií koa xan-nò mé-ne nga kàtasobà-nò. ¿A mìtsà tíjna jngoò xita xinguioo xi tíjn-la kjohítsjeèn nga koma-la koìindaàjìin-la xita xi 'ndsé chibá? ⁶ Mitsà ta koií kjoa-la nga

bixkàn-koo xingui_{oo}, skanda yaá onguík_{oo} xingui_{oo} nguixk_{on} xitaxá xi mìkìl beèxkon Nainá nga bìn_{da}àjìin-nò.

⁷ Kixíí kjoa, ch'oó tjin kjoa k'e nga tijñò bixkàn-kò-nò xingui_{oo}. ¿Mé-ne mìtsà ta saá nìkjeíin-là xingui_{oo} k'e nga ch'o síkò-nò? Ta saá tìkjeíin-la nga kàtasíchijé-nò. ⁸ Tanga jñò, k'oaá tìs'ín ch'o nìkoo xingui_{oo}, tijñò nìchijé-là.

⁹ ¿A mìtsà tíjìin-nò nga jñà xi mìtsà xitá kixi, mìkìl kjoahas'en-jìin i'nde ñánda tíhotíxoma Nainá? Jñà xitá xi kjoa chijngui s'ín, jñà xi xkósòn beèxkón, jñà xitá xi jye chixàn xi kjoa chijngui s'ín, jñà xitá xi'ndè xi tì x'in xíkjin oyijòkò-ne, ¹⁰ jñà xitá chijé, jñà xitá tse mejèn, jñà xitá xi xán 'biì, jñà xi xitá chjajno-la, jñà xitá xi konachan-la xíkjin nga síchijé-la, kì yijo-nò chonachan-là nga jñà xitá xi koatjin kjoach'o xi s'ín mìkìl kjoahas'en-jìin ñánda tíhotíxoma Nainá. ¹¹ Jñò, k'e nga sa kjòtseé k'oa tìs'ín kì'nè i'nga; tanga i'ndeì, jye kisaníjno kjoa ts'e jé-nò, jye xitá tsjeè-la Nainá komà, kò jye xitá kixi komà it'aà ts'e nga'ñó-la Jesucristo xi otíxoma-ná kò it'aà ts'e Inima Tsjeè-la Nainá.

Kó s'ín síchjeén yijo-ná mé-ne nga jeya kíjna Nainá

¹² Tjin i'nga xitá xingui_{oo} xi tsò: “An tíj'ndeé-na nita mé kjoa xi s'iaàn.” Kixíí kjoa tíj'nde-né, tanga mìkìl ok'in-la tsà k'oas'en yijeé ngats'ì kjoa; k'oaá ma-ne, 'an, mìkìl tsjaà'nde-la yijo-na nga sìikijne-na jngò kjoa. ¹³ Tìkooá tjin i'nga xi tsò: “Jñà tsojmì xi ma chine, ts'ée indso'ba, koa jè indso'ba mochjeén-la tsojmì xi ma chine.” Kixíí kjoa, tanga ingajò kjoa koi, Nainá sìkجهet'aà. Tanga jè yijo-ná,

mìtsà kòs'ín kòchjeén nga kjoa chijngui s'eén; it'aà ts'e Nainá kòchjeén; yijo-ná, ts'eé Nainá. ¹⁴ Koni s'ín kis'iin Nainá nga kisikjaáya-la Na'èn-ná Jesús, jñá k'oaá tìs'ín kjoaáya-ná it'aà ts'e kjoa biyaà nga tjín-la nga'ño Nainá.

¹⁵ ¿A mìtsà tíjìn-nò nga jè yijo-ná, yaá tíkjoòkò ts'e Cristo? ¿A komaá sikkjeén yijo-la Cristo nga sijngoot'aà-lá ts'e chjoón ská? Majìn, mìkiì koma.

¹⁶ ¿A mìtsà 'yaà, k'e nga jngoò xita x'in, tsà chjoón ská kijnako, jngoò yijoó koma? Nga k'oaá s'ín tíchja Xojon-la Nainá nga tsò: Ingajò xita koi, jngoò yijoó koma. ¹⁷ Tanga jè xi Na'èn-ná tíjnako, yaá majngoòkò inima-la kò ts'e Na'èn-ná.

¹⁸ Tinchat'aàxìn-la kjoa chijngui. Jngoò xita, nita mé jé xi ótsji xi kj'eí jé, mìtsà yijo-la tíbeètoòn. Tanga jè xita xi kjoa chijngui s'ín, yijo-laá beètoòn.

¹⁹ ¿A mìtsà tíjìn-nò nga jè yijo-nò ni'ya-la Inima Tsjeè-la Nainá-né xi jño kitsjaà-nò Nainá nga tíjnajìn inima-nò? Yijo-nò, mìtsà tì tsajòn-nò.

²⁰ Nainá jye tsakatse-nò, tseé tsibíchjítjì-nò. Koií kjoa-la jchaxkón Nainá, ndaà tikjeén yijo-nò nga ts'eé Nainá.

7

Kjoa ts'e xita xi bixan

¹ It'aà ts'e 'én xi kichjìngui-ná nga kinìkasén-ná xojon nga bixón: “Ndaà-la tjín, jngoò xita x'in kò jè chjoón tsà mìkiì kixan.” ² Tanga koií kjoa-la nga 'ño tjín kjoa chijngui, nga jngoò ìjngoò xita x'in kàtas'e-la chjoón, kò nga jngoò ìjngoò chjoón kàtas'e-la x'in. ³ Koni s'ín tjín kjotixoma ts'e kjoa bixan, jè x'in, ndaà kàtasís'in-la chjoón-la k'e

nga kójnako, tikoá jè chjoón, ndaà kàtasís'in-la x'in-la. ⁴ Jè chjoón, mìtsà tijè otíxoma-la yijo-la, jè x'in-la otíxoma-la. Tikoá jè x'in mìtsà tijè otíxoma-la yijo-la, jè chjoón-la otíxoma-la. ⁵ K'e nga tsjáyjòkoo xinguioo, kì yijo-nò nìxkon-là xinguioo. Tà k'e-né tsà ngásòn chibàya-nò kótjín nàchrjein mìkìl tsjáyjòkoo xinguioo tsà Nainá kìnókjoat'aà-là. Xi koma įskan mochjeén-né nga sıs'in-là xinguioo nga mì jè xıtà neį skónačan-nò k'e nga tsà mì tı kùl chıkjoa-nò nga xìn tsjáyjì-là xinguioo.

⁶ Én xi tìxan-nò tà 'an-ná xi tıtsjaà'nde-nò; mìtsà kjotıxoma tıbìnè-nò. ⁷ Xi it'aà ts'an, mejèn-na tsà ngats'ı̀ xıtà k'oas'ın kàtıtsajna tajngoò, koni 'an, tajngoó tıjnaa. Tanga įjngoò įjngoò xıtà kits'ı̀-la kjotıjò xi Nainá kitsjaà-la, kós'ın kıtsajna. Kək'ejı kək'ejı s'ın tıtsajna nga įjngoò įjngoò xıtà.

⁸ Jñà xıtà xi tıtsajna tajngoò ko jñà íchjın xi jye k'en x'in-la, ndaà-la tjın tsà tà k'oas'ın kıtsajna tajngoò koni 'an. ⁹ Tanga tsà mìkìl chıkjoa-la nga bıtsajna įjngó, įsaá ndaà-ne tsà kàtıxan, mì k'oane tsà tsjè sıık'en.

¹⁰ 'An, k'oaá s'ın bìnè-la jñà xıtà xi jye chixàn, nga mìkìl koma tsjeın xıkjın. Jè chjoón, mìkìl koma sııkıjna x'in-la. Mıtsà kjotıxoma ts'an xi tsjaà-nò; ts'eé Nainá. ¹¹ Jè chjoón xi tsjeıın x'in-la, mìkìl tjı'nde-la nga kj'eıı x'in kıxan-ko įjngoò k'a. Tikoá-ne kàtajoondaà-ne. Tikoá jè x'in, mìkìl tjı'nde-la nga tsjeın chjoón-la.

¹² Jñà xıtà xi i'nga, k'oaá xan-la, xi tà kjohıtsjeèn ts'an, mìtsà jè Na'èn-ná tsıbıjna kjotıxoma jè. Tsà įjngoò xıtà x'in xi mokjeıın-la 'én-la Nainá, tsà jè

chjoón-la xi tíjnakò, tsà mìkìl mokjeiín-la, tsà tsò ikon jè chjoón nga bìjnakò, kàtìjnakò, kì tsjeiìn takòn jè chjoón-la. ¹³ Tsà jngò chjoón xi mokjeiín-la 'én-la Nainá, jè x'in xi tíjnakò, tsà mìkìl mokjeiín-la, tsà tsò ikon jè x'in nga bìjnakò, kàtìjnakò, kì tsjeiìn takòn jè x'in-la. ¹⁴ Jè x'in xi mìkìl mokjeiín-la 'én-la Nainá, ìt'aà ts'e chjoón-laá matsjeè-né; tìkoáá jè chjoón xi mìkìl mokjeiín-la, ìt'aà ts'e x'in-laá matsjeè-né. Tsà majìn, jñà ìxti-la mìtsá xità kixì nga nguixkon Nainá, tanga ì'ndeì ìxti-la, yaá chja-ne naxandá-la Cristo. ¹⁵ Tanga tsà jè chjoón xi mìkìl mokjeiín-la 'én-la Nainá tsà mejèn-la tsjeín x'in-la xi mokjeiín-la, kàtatsjeiìn. Kò tsà jè xità x'in xi mìkìl mokjeiín-la 'én-la Nainá, tsà mejèn-la nga tsjeín chjoón-la xi mokjeiín-la, kàtatsjeiìn. Jñà xità koi mìkìl tjínè-la nga kjo'ño kítsajnakò xíkjín. Nainá, jè xi mejèn-la nga 'nchán kítsajna. ¹⁶ Jì chjoón xi mokjeiín-lè ìt'aà ts'e Cristo, mìkìl tjììn-lè tsà koi nàchrjein ìt'aà tsiji koma kitjokàjììn kjo'in x'in-lè. Kò jì xi x'in 'mì-lè nga mokjeiín-lè ìt'aà ts'e Cristo, mìkìl tjììn-lè tsà koi nàchrjein ìt'aà tsiji koma kitjokàjììn kjo'in chjoón-lè.

¹⁷ Jngò kjoa mejèn-na nga ndaà síkìjna-la ngats'iì xità naxandá-la Cristo, nga ìjngò ìjngò xità x'in kò chjoón, mochjeén-né nga kos'in kàtasìjchá yijo-la koni s'in kitsjaà-la Nainá koni s'in títsajna k'e nga Nainá kiìchja-la nga xità-la komà. ¹⁸ Tsà tjín i'nga xità xi jye tjít'aà chiba yijo-la kjoa ts'e circuncisión k'e nga xità-la Cristo komà, tà k'oáá s'in kàtìjna. Tsà tjín i'nga xi k'j'eè kii tjít'aà chiba yijo-la, kì bít'aà chiba-la yijo-la. ¹⁹ Xi kjoa ts'e circuncisión, tsà tjít'aà chiba-nò kò tsà majìn,

mìtsà mé-ne. Jè xi chjì-là nga ndaà s̄ikitasòn jè kjotíxoma-là Nainá. ²⁰ Nga jngoò ìjngoò, k'oaá s'ín t̄itsajna koni s'ín t̄itsajnaà k'e nga kiichja-nò Nainá. ²¹ K'e nga kiichja-lè Nainá, tsà ch̄'nda t̄ijni, k̄i makájno-lè. Tanga i'ndeī tsà koma kijnandeī-ne, ndaà s'e, t̄ijnandeī-ne. ²² Jè xi ch̄'nda t̄is'ín k'e nga kiichja-là Nainá nga k̄okjeín-là 'én-là, i'ndeī t̄ijnandeī-né it'aà ts'e Cristo. K'oaá t̄is'ín t̄jín, jè xi t̄ijnandeī k'e nga kiichja-là Nainá, i'ndeī ch̄'nda-là Cristo-né. ²³ J̄nò, Nainá jye tsatse-nò, k̄i kiì biì'nde nga x̄it̄a xi k̄j'eī ch̄'nda 'nè-là. ²⁴ J̄nò ndí 'ndsè k̄o t̄ichjaá, koni s'ín t̄itsajnaà nga jngoò ìjngoò k'e nga kiichja-nò Nainá, k'oaá s'ín t̄itsajna ya nguixkon Nainá.

²⁵ It'aà ts'e x̄it̄a xi t̄itsajna tajngoò, tsjìn jngoò-na kjotíxoma xi ts'e N̄a'èn-ná. 'An, k'oaá s'ín kosòn-là koni tsò kjohítsjeèn-na nga Nainá kis'e-là kjohimatakòn mé-ne nga it'aà ts'an kjoaàt'aà takòn-na j̄nà x̄it̄a. ²⁶ Koií kjoa-là nga 'ñó 'in choòn n̄achrjein i'ndeī, 'an, k'oaá s'ín sikítsjeèn, ìsáá-là ndaà t̄jín, tà k'oaas'ín k̄at̄itsajna x̄it̄a koni s'ín t̄itsajna skanda n̄achrjein i'ndeī. ²⁷ Tsà t̄jín-lè chjoón, k̄i n̄ikíjna-jèn chjoón-lè. Tsà tsjìn-lè, k̄i chjoón binchaàtsji. ²⁸ Tsà kixein, mìtsà jé t̄ibinchaàtsji. K̄o tsà jngoò chjoón x̄ongó xi k̄ixan, t̄ikoaá mìtsà jé t̄ihótsji. Ta jè-né, k'e nga jye k̄ixan, kjoaá s'e-nò. 'An, mejèn-na nga mì kjoa k̄atas'e-nò.

²⁹ Ndí 'ndsè, mejèn-na nga k̄atasijìn-nò, nga chiba jchán n̄achrjein chija nga ma s̄ixá-lá Nainá. Koií kjoa-là jngoò x̄it̄a x'ín xi t̄jín-là chjoón, k'oaá s'ín k̄atas'ín koni tsà tsjìn-là chjoón. ³⁰ K̄o j̄nà x̄it̄a xi kjoaba t̄itsajnajìn, k'oaá s'ín k̄at̄itsajna koni tsà

mì ba títsajna. Koḗ jñà xi s'eí tjín-la, k'oaá s'ín kàtìtsajna koni tsà mì s'eí tjín-la. Koḗ jñà xi tsojmì otse, k'oaá s'ín kàtas'ín koni tsà nìmé tjín-la. ³¹ Ko jñà xi fitjingui-la kjoḗ xi tjín isò'nde, k'oaá s'ín kàtas'ín koni tsà mì ya fitjingui-la; nga jè isò'nde xi titsajnasoán ijndé, kjoehet'aà-né.

³² 'An, k'oaá s'ín mejèn-na nga nìmé kjoḗ ts'e isò'nde s'íkìtsjeèn. Jè xìta x'in xi tíjna tajngoò, koií s'íkìtsjeèn kjoḗ ts'e Nainá, mé xi s'iin nga kotsja-la Nainá. ³³ Tanga jè xi jye chjoón tjín-la, koií s'íkìtsjeèn kjoḗ xi tjín isò'nde mé xi s'iin nga kotsja-la chjoón-la, ³⁴ k'oaá ma-ne nga jò kjoḗ s'íkìtsjeèn. Tikoá jè chjoón ka'àn xi jye k'en x'in-la kò jè chjoón xi tíjna tajngoò xi kj'eè x'in tjín-la, koií s'íkìtsjeèn kjoḗ ts'e Nainá mé-ne nga tsjeè s'íkìtsajna-ne yijo-la kò inima-la. Tanga jè chjoón xi x'in tjín-la, koií s'íkìtsjeèn kjoḗ ts'e isò'nde mé xi s'iin nga kotsja-la x'in-la.

³⁵ Kjoḗ xi benojmí-nò kjondaà tsajòn-nò, mìtsà xan-nò nga 'an ósjina ikon-nò, jè-né nga nguì ndaà sijchá yijo-nò nga nìmé kjoḗ kùichjoà ikon-nò nga s'ixá-là Nainá.

³⁶ Tsà jngoò x'in xi kos'ín tís'íkìtsjeèn nga mì ndaà tís'íkò chjoón nga mì xátí tìbixan-kò nga jye tìhóto nó-la chjoón, k'oaá s'ín kàtas'ín koni s'ín s'íkìtsjeèn, kàtixan; jè kjoḗ bixan, mìtsà jé nchihótsji. ³⁷ Tanga tsà jngoò xi k'oas'ín bìnè-la yijo-la kò inima-la nga majìn-la kixan, nga kjohítsjeèn ts'e-né, kò tsà chíkjoḗ-la yijo-la nga mìkì kixan, kò tsà jye kos'ín kiskoòsòn-la, ndaà tjín. ³⁸ Jñà xìta xi bixan, ndaà s'ín, tanga jñà xi mìkì bixan, isaá ndaà s'ín.

³⁹ Jngoò chjoón xi x'in tjín-la, mìtsà tíjnandeíí.

K'ée-né tsà jye k'en x'in-là nga jye tijnandeíí. Koma kixan-ko nita yá x'in-ne xi matsjakeè tsà tanga mokjeiin-là 'én-là Nainá. ⁴⁰ 'An, k'oaá s'in síkítsjeèn, ndaà-la tjin tsà mì tì kii kixan-ne jña íchjín ka'àn. Tikoáá 'an, k'oaá s'in machiya-na nga jè Inima Tsjeè-là Nainá tísichiya-na.

8

Tsojmi xi sinchásòn ya nguixkon xkósòn

¹ Jè kjoa xi ts'e yijo-là cho xi sík'en-là xkósòn-là xita isò'nde nga tsjá-là kjotjò, jñò bixón-nò nga ngats'iaá jyeé tjin-ná kjoachjine it'aà ts'e kjoa koi. Kixii kjoa, tanga k'e nga tjin-ná kjoachjine, ma'ngaá takoán. Tanga k'e nga tjin-ná jè kjotsjacha, isaá ndaà 'biì-lá nga'ño xinguiáá. ² Tsà tjin i'nga xita xi tsò nga ndaà machiya-là, chijaá isa-là; kj'eè kii beè yije koni s'in tjinè-là nga skoe. ³ Jngoò xita xi matsjakeè Nainá, jè Nainá ndaà beèxkon.

⁴ K'oaá xan-nò kó s'in tjin, tsà ma chine yijo-là cho xi ya biyaàt'aà-là jña xkósòn. Tjiiin-ná nga jña xkósòn xi tjin i isò'nde, nimé nga'ño tjin-là. Nga ta jngoò ma-ne xi Nainá. ⁵ Jña xita, k'oaá s'in síkítsjeèn nga kjin ma nainá xi tjin ján ngajmii ko it'aà nangui. (Kixii kjoa it'aà ts'e xita koi, kjin ma xi nainá ko na'èn-ná tsò-là.) ⁶ Tanga jña, 'ya-ná nga ta jngoò ma-ne Nainá xi Na'èn-ná nga it'aà ts'ée inchrobà-ne nita mé xi tjin. Jña, koií xá tjin-ná nga síkitasoán xá-là. Tikoáá ta jngoò ma-ne xi otixoma-ná, jè Jesucristo; nga it'aà ts'ée nga'ño-là kisindaà yije nita mé xi tjin ko tikoáá jña, it'aà ts'ée titsajnakoaán.

⁷ Tanga mìtsà ngats'ìi xita tíjìn-la kjoa koi. Tjín i'nga xita 'ndseé xi jye k'oas'ín kjò'nga-la kjoa ts'e xkòsòn k'e nga tikj'eé mokjeiín-la. Tanga i'nde, k'e nga kine yijo-la cho xi ya biyaàt'aà-la jñà xkòsòn, k'oaá s'ín síkítsjeèn nga jñà nchibeèxkón xkòsòn xi nainá tsò-la xita isò'nde. Nga jò tjín kjohítsjeèn-la, k'oaá s'ín fiya-la nga jé ótsji nguixkon Nainá. ⁸ Jñò bixón-nó nga jñà tsojmì xi ma chine, mìtsà koi kjoa-la nga isa ndaà skoétjò-ná Nainá. Tsà kichiaá mìtsà isa ndaà kitsajnaá ko tsà mìkii kichiaá mìtsà isa ch'o kitsajnaá nga nguixkon Nainá. ⁹ Kixij kjoa, tjí'nde-ná nita mé xi chjineé. Tanga jñà jchòsòn-lá yijo-ná nga mì k'oaá tjín xi chjineé mé-ne jñà xita 'ndseé xi indaàjìn tjín kjohítsjeèn-la mì jé sakò-la. ¹⁰ Tsà tjín jngoò xita xinguiòo xi tsò nga tjín-la kjohítsjeèn nga ma chine nita mé yijo-ne, ko yaá fi kakjèn ya i'nde ñánda yaxkón xkòsòn; tsà koi nachrjein-la ya skoe jngoò 'ndsé xi indaàjìn tjín kjohítsjeèn-la nga ya tikjèn. Jè xita 'ndsé, k'oaá tis'ín s'iin. ¹¹ Kjohítsjeèn-la xita jè nga tsò nga maá chine yije nita mé-ne, koií kjoa-la nga kjo'in sùkjeiín jè 'ndsé xi indaàjìn tjín kjohítsjeèn-la xi Cristo k'en ngajo-la. ¹² K'e nga jé binchaàtsjioò xi kondra ts'e xita 'ndseé nga nikits'ón-jñò kjohítsjeèn-la xi indaàjìn tjín, jé binchaàtsjioò xi kondra ts'e Cristo. ¹³ An, tsà ta koií kjoa-la ts'e tsojmì xi kínee nga jé sakò-la jè 'ndsè, tikoáá-ne, jngoò k'a mì ti kii skíne-na yijo, mé-ne nga mì jé sakò-la 'ndsè.

9

Kjoa xi tjí'nde-la xita xi tsibíxáya-la Cristo

¹ 'Aán tsibíxáya-na Cristo. Tìjnandejìí-ná. Xkoaàn kijtseè-na jè Jesús xi otíxoma-ná. Nga xá-la Na'è-ná tis'iaàn, i'ndeji jñò-nò xi xítà-la Cristo maà. ² K'oaá xó tsò i'nga xítà xi kj'eíí nga mì xó tsà 'an tsibíxáya-na Cristo, tanga jñò, ndaà tíjiin-nò nga 'aán kisìxáya-na, nga it'aà ts'an-ná nga mokjeíin-nò 'én-la Nainá. K'oaá s'ín bitjo kixi kjoa.

³ K'e nga jngoò xítà kjonangui-na xi kondra ts'an, 'an, kíí xan-la nga ósikoaa yijo-na: ⁴ ¿A mìtsà tíj'nde-najen nga k'oi-najen tsojmì xi chine-jen kò xi s'io-jen nga xá-la Nainá titsa'nè-jen? ⁵ ¿A mìtsà tíj'nde-najen nga kítjako jngoò-jen xi chjoón-najen ma xi 'én-la Nainá mokjeíin-la, koni s'ín xítà xi i'nga xi tsibíxáya-la Cristo koni jñà 'ndse Na'è-ná kò Cefas [xi tìkoa Pedro 'mì]? ⁶ ¿A tà 'an-ná kò Bernabé xi tjínè-najen nga kj'eíí xá s'en-jen mé-ne nga sakò-najen tsojmì xi chine-jen? ⁷ ¿A tjín xítà xi soldado síkitasòn xi tíjé bíchjí-la yijo-la? ¿A tjín xítà xi bítje tsojmì tjé, koa mìkìì kine toò xi ojà-la? ¿A tjín xítà xi cho síjchá, koa mìkìì 'biì tsjìn xi ochrje? ⁸ Kì k'oaá s'ín nìkìtsjeèn nga tà kjohítsjeèn ts'an koni s'ín tìxan. Tìkoaá tíchjaá kjotíxoma ts'e Moisés. ⁹ Kjotíxoma-la Nainá xi kiskìì Moisés, k'oaá s'ín tíchja nga tsò: “Jñà nchraja xi bínchi, kì na'ya bì'a tso'ba.” 'Én koi mìtsà tsò-ne kjoa nga Nainá 'ñó síkinda nchraja, ¹⁰ jñá-ná xi síkinda-ná Nainá; nga it'aà tsaján tíchja kjotíxoma. Jè xi síkínchi nchraja kò xi sítsjeè tsojmì xi majchá-la, nchikoñaá-la nga tjoé chiba-la tsojmì xi majchá-la. ¹¹ 'Én ndaà-la Nainá xi kjoa ts'e Cristo xi jin tsakoòya-nòjen jè ngayá-la koni tachó xi kisìtje ijjiin inima-nò. ¿A mì ndaà s'e tsà tjoé chiba-najen tsojmì xi majchá-nò?

¹² Tsà jñà xi kj'eij̄ x̄ita tjoé chiba-la tsojmì xi tsajòn, ngajen, ¿a mìtsà ìsa ndaà tjí'nde-najen nga t̄ikoa tjoé-najen?

Tanga mì k'oaá s'ín titsa'nè-jen koni s'ín tjí'nde-najen mé-ne nga mìkì koma sìchjoà ikon-la 'én ndaà-la Nainá xi kjoa ts'e Cristo. ¹³ Jñò, ndaà 'yaà, jñà x̄ita xi ya síxá ya Ingo Ítjòn-la Nainá, koií tsojmì kine xi t̄jín ya i'nde jè; ko jñà xi ya síxá i'nde tsjeè-la Nainá ya ñánda binchásòn kjotjò xi tsjá-la Nainá jñà x̄ita, okoó chiba-la yijo-la cho xi ya binchásòn. ¹⁴ Nainá k'oaá s'ín kitsjaà okixi: jñà xi chjaya 'én ndaà-la Nainá xi kjoa ts'e Cristo yaá sakò-la tsojmì xi skine. ¹⁵ 'An, mì k'oaá s'ín t̄isikjeén jñà kjoa xi tjí'nde-na. T̄ikoaá mìtsà koi xá tikji-nò nga kos'ín síko-ná. Ìsaá-la ndaà t̄jín tsà kàtiyaa mì k'oaá-ne tsà t̄jín x̄ita xi kjoaáxìn-na kjotsja xi t̄jín-na nga ta kjotjò 'an chjaya 'én ndaà-la Nainá xi kjoa ts'e Cristo.

¹⁶ Nga 'én ndaà-la Nainá xi kjoa ts'e Cristo chjaya, mìkì tsà jeya síkijna yijo-na. 'An, xó k'oaá s'ín t̄jínè-na nga 'an kichjaya; ima xó-na tsà mìkì kichjaya jè 'én ndaà-la Nainá xi kjoa ts'e Cristo.

¹⁷ Tsà tà kjohítsjeèn ts'aán-là nga kos'ín t̄is'iaàn, t̄jínè-la nga kochjí-na, tanga mìtsà tà kjohítsjeèn ts'an, jè t̄isikitasoàn xá xi kisingatsja-na Nainá. ¹⁸ Jè chjí xi t̄isakó-na, jè-né nga tsja t̄jín-na nga chjaya 'én ndaà-la Nainá xi kjoa ts'e Cristo nga mìtsà chjí-na sìjé, nas'ín tjí'nde-na nga jè 'én ndaà-la Nainá xi kjoa ts'e Cristo kótijnakon-na.

¹⁹ 'An t̄ijnandejí-ná, tanga i'ndeij, k'oaá s'iaàn koni tsà ch̄inda-la ma ngats'ìi x̄ita, mé-ne nga ìsa kjìn x̄ita koma kichjà-la 'én-la Cristo nga

kokjeiín-la. ²⁰ K'e nga ya tìjnajiìn-la jǎà xìta xinguiáa judío, k'oaá s'ín s'iaàn koni s'ín xìta judío mé-ne nga koma kichjà-la 'én-la Cristo nga kokjeiín-la. Kixí kjoa nga 'an, mìkì kjo'ńó tǐnè-na nga kos'ín sikitasoàn koni tsò kjotíxoma xi kiskìi Moisés, tanga k'e nga ya tìjnajiìn-la jǎà xìta judío xi kjotíxoma-la Moisés títsajnajìin, 'an k'oaá ti s'iaàn, ta jè xi mejèn-na nga koma kichjà-la 'én ndaà-la Nainá xi kjoa ts'e Cristo nga kokjeiín-la. ²¹ K'e nga ya tìjnajiìn-la jǎà xìta xi mìtsà ya títsajnajìin kjotíxoma-la Moisés, 'an, k'oaá ti s'iaàn koni tsà mì ya tìjnajǎà kjotíxoma mé-ne nga koma kichjà-la 'én-la Cristo nga kokjeiín-la xìta xi mì ya títsajnajìin kjotíxoma. Mìtsà tsò-ne kjoa nga tìjnat'aà xìn-la kjotíxoma-la Nainá. Yaá tìjnajǎà kjotíxoma-la Cristo. ²² K'e nga ya tìjnajiìn-la jǎà xìta xi indaàjìin tǐn kjohítsjeèn-la, 'an, k'oaá s'iaàn koni tsà tìkooá indaàjìin tǐn kjohítsjeèn-na mé-ne nga koma kichjà-la 'én-la Cristo xìta koi. Yaá sǐngàsòn yijekoáa mé kjoa xi títsajnajìin ngats'ìi xìta mé-ne nga koma kochrjekàjìin i'nga-na kjo'in kjoa ts'e jé-la. ²³ K'oaá s'iaàn xi kjondaà ts'e 'én ndaà-la Nainá xi kjoa ts'e Cristo mé-ne nga s'e-na kjoa machikon-t'in ìt'aà ts'e 'én.

²⁴ Jǎò, jyeé tǐjìin-nò k'e nga síská xìta xi ongachikon, ngats'ìi-né nga ongachikon, tanga ta jn-godè-né xi tjoé-la kjotjò, ta jè xi síkijne. Jǎò, k'oaá s'ín tǐjchá yijo-nò nga xìta-la Cristo 'mì-nò koni jngoò xìta xi ongachikon mé-ne nga tjoé-nò kjotjò xi Nainá tsjá-nò. ²⁵ Jǎà xìta xi sískákjoò nga mejèn-la sǐkijne, ítjòn bìtsajnandaà nga mì tǐjǎà sǐkjeén-ne tsojmì xi ch'o síko; koi k'oas'ín-ne nga mejèn-la tjoé

jngoò-la kjoṭjò. K'e nga jye ma iskan, jè kjoṭjò xi tjoé-la, ta bits'on-né. Tanga jñá bitsajnandaá nga tjoé jngoò-ná kjoṭjò xi mìkìì bits'on nṭa kjé-ne. ²⁶ 'An, mìtsà k'oas'ín ongachikoan [kjoa ts'e xá-la Nainá] koni jngoò xṭa xi mìkìì beè ñánda kijchò. Tikoáá mìtsà k'oas'ín [sìxá it'aà ts'e Nainá] koni s'ín xṭa xi ta 'beéjìn isén k'e nga kjaán-ko xíkjín. ²⁷ 'An, k'oáá s'ín bìnè-la yijo-na nga kàtas'e-na kjo'in mé-ne k'e nga kjoehet'aà nachrjein nga okoòya-la xṭa 'én ndaà-la Nainá xi kjoa ts'e Cristo, Nainá mì kṭso-na: “Nì mé chjì-la xá-lè.”

10

Kjoa ts'e xkòsòn xi mìtsà kixi kjoa nga Nainá

¹ Jñò ndí 'ndsè ko tichjaá, kì nìchàajìn-jèn nga jñà xṭa jchínga kjiìn-ná, [k'e nga itjoiìn naxandá Egipto], yaá tsibítsajnangui yije jjiìn ifi [nga tsakó-la ndiyá], tikoáá ngats'ìì tsatojiìn ndáchikon. ² K'oáá ngaya-la koni tsà komà bautizar ya jjiìn ifi ko jjiìn ndáchikon mé-ne nga xṭa-la Moisés koma-ne. ³ K'oáá tṭs'ín jngoò skaya tsojmì kiskine xi kjoṭkón ndaà ts'e Nainá. ⁴ Tikoáá ta jngoò skaya nandá kits'ìì xi kjoṭkón ndaà ts'e Nainá, jè nandá xi ya naxi itjo-ne nga jè Nainá kitsjaà-la. Jè naxi, jè ngaya-la Cristo nga jè tsajmeeyako ndiyá ñánda chinchimaya. ⁵ Tanga jñà xṭa jchínga koi, kjìn jchán k'en ya ñánda nangui kixi choòn nga Nainá mìkìì kisaseèn-takòn koni s'ín kis'ìì ngats'ìì xṭa jchínga koi, ta chibaá tsiningui-ne.

⁶ Jñà kjoa xi k'oas'ín komà, jñà okóya-ná nga mì jñà sikjaàjñá kjoa xi ch'o tjín koni kis'ìì jñà xṭa jchínga-ná. ⁷ Kì k'oá s'ín sando xkòsòn yaxkón

koni kis'iìn i'nga x̄it̄a jchínga koi, nga k'oaá s'ín tíchj̄a Xoj̄on-la Nainá nga tsò: “J̄n̄à x̄it̄a nax̄andá tsibítsajna nga tsakj̄èn koa kits'iì, ik̄joàn tsasítjen nga kitè [nga jè kisítsjako xkósòn].” ⁸ T̄ikoaá mìkiì kjoa chijngui s'eén koni s'ín kis'iìn i'nga x̄it̄a jchínga koi, nga tà jngoò nachrjein kaàn jàn jmiì x̄it̄a k'en. ⁹ Mì kì tax̄k̄i chít'aá Na'èn-ná koni s'ín kis'iìn i'nga x̄it̄a jchínga koi; k'oaá komà-ne nga k'en nga kiskine-la ye. ¹⁰ T̄ikoaá kì í'ñó-isa tsajèt'aà-là Nainá koni s'ín kis'iìn i'nga x̄it̄a jchínga koi. K'oaá komà-ne nga jè àkjale-la kjoabiyaà kisik'en x̄it̄a koi.

¹¹ Ngats'iì kjoa koi, k'oaá s'ín komàt'in j̄n̄à x̄it̄a jchínga-ná ko k'oaá s'ín kisijna ch̄iba mé-ne s̄ij̄iìn-ná. Kisit'aà Xoj̄on-la Nainá nga jchaá j̄n̄à mé kjo'in xi s̄inè-ná tsà k'oa t̄is'ín s'eén j̄n̄à xi titsajnakoaán nachrjein xi jye tífehèt'aà. ¹² K'oaá ma-ne jè xi kos'ín síkítsjeèn nga kixi t̄ijna, kàtasíkinda yijo-la nga mì jé sakó-la. ¹³ J̄n̄ò, kj'eè mé kjoa xi mat'ioòn nga tíchit'aà-nò xi isa 'ñó 'in t̄j̄ín koni mat'in x̄it̄a xi kj'ejí. Nainá, x̄it̄a kixi-né, jè kàta'ñót'aà takòn nga mìkiì tsjá'nde nga isa tsato chít'aà-nò koni k̄i chíkjoak̄o-nò. T̄ijè-ne Nainá kokò ndiyá kós'ín k̄ichìkjoa-nò koni s'ín tíchit'aà-nò skanda k'e nga kjoehèt'aà kjoa.

¹⁴ J̄n̄ò ndí 'ndsè, n̄i j̄tsé kjoa ts'e xkósòn n̄ikítsjeèn nga mejèn-nò jchaxkón. ¹⁵ 'An, k'oaá s'ín tíchj̄a-nò koni x̄it̄a xi t̄j̄ín-la kjohítsjeèn. Jchósòn-là 'én xi xán-nò, a kixi kjoa. ¹⁶ K'e nga 'yooá vino xi t̄j̄iya ch̄itsín nga n̄ijét'aà-lá Nainá nga kàtasíchikon-t'in, ¿a mìtsà ya ñingásòn-koaá ko jn̄i-la Cristo? Ko k'e nga n̄ixkoayaá inchrájín, ¿a mìtsà ya ñingásòn-koaá ko yijo-la Cristo? ¹⁷ J̄n̄à, nas'ín 'ñó k̄j̄ìn ma-ná, jè

inchrajín xi bichiaá, ta jngoò ma-ne; k'oaá ma-ne nga ngats'iaá, ta jngoò yijo ma-ná.

¹⁸ Chítsejèn-là xità naxandá Israel, jñà xi kine yijo-là chọ xi biyaà ya i'nde tsjeè nga tsjá-là kjotjò Nainá. Xità koi, yaá síngàsòn-kọ kjotjò xi tsjá-là Nainá ya i'nde tsjeè. ¹⁹ K'e nga k'oa xan-nò, mìtsà xan-nò nga tjín-là okixi jñà xkósòn kọ tsojmì xi sinchát'aà-là. ²⁰ Jñà 'én xi xan-nò, jñà kjotjò xi fikọ jñà xità xi mìkiì beèxkon Nainá, jñà fikọ-là inìma ch'o-là nejí, mìtsà jè sobà Nainá. 'An, majìn-na nga ya síngàsòn-kọ inìma ch'o-là nejí. ²¹ Mìkiì ndaà tjín, k'e nga jye 'yò vino xi ts'e Jesús, xi otíxoma-ná, ikjoàn s'ioo xi ts'e inìma ch'o-là nejí. Tíkooá mìkiì ndaà tjín, k'e nga jye bichioò inchrajín xi ts'e Jesús, ikjoàn bichioò xi ts'e inìma ch'o-là nejí. ²² ¿A xi mejèn-nò sikjàn-là Na'èn-ná nga kàtachini? ¿A ìsaá tjín-nò nga ñó mì k'oa-ne Nainá?

Jè kìnchátsjiaá ítjoán kjondaà ts'e xità xi kj'eíí

²³ Tsò jñà xità: “Tjì'nde-né nità mé xi s'eén.” Kixíí kjoa tjì'nde-né, tanga mìtsà ngats'ìí kjoa nga ndaà tjín. Tjì'nde-né nità mé kjoa xi s'eén, tanga mìtsà ngats'ìí kjoa tsjá-ná nga'ñó. ²⁴ Mìtsà tà kjondaà tsajòn binchaàtsjioò ítjòn, jè tinchátsjioò ítjòn kjondaà ts'e xità xi kj'eíí.

²⁵ Maá chìnee nità mé yijo xi satíjna ya ñánda biyaà chọ. Kì kiì chjinanguio ñánda j'ìí-ne mé-ne nga mì ch'o koma-là kjohítsjeèn-nò. ²⁶ Nga ts'eé Na'èn-ná jè nangui kọ ngats'ìí tsojmì xi tjín-là.

²⁷ Tsà jngoò xità xi mìkiì mokjeiín-là 'én-là Nainá, kichja-nò nga kichikọ, tsà mejèn-nò nga onguíó, chjìnee yije-nò xi tsjá-nò. Kì mé xi chjinanguio nga mì ch'o koma-là kjohítsjeèn-nò.

28 Tsà jngoò x̄it̄a xi kit̄so-nò: “J̄n̄à tsojmì koi, yaá kisinchaàt'aà-l̄a xkòsòn.” Jè kjoa-l̄a x̄it̄a xi okitsò-nò, kì kii chine, mé-ne nga mì ch'o koma-l̄a kjohítsjeèn-l̄a. 29 Mìtsà kjohítsjeèn tsajòn xi tìxan-nò, ts'eé x̄it̄a xi okitsò.

Tanga tsà t̄jín i'nga x̄it̄a xi skonangui nga kit̄so: “¿Mé-ne mì t̄jí'nde-na nga s'iaàn n̄it̄a mé kjoa xi mejèn-na nga ta koi kjoa-l̄a nga mì ch'o koma-l̄a kjohítsjeèn-l̄a x̄it̄a xi kj'eíí? 30 'An, tsà tsjaà-l̄a kjondaà Nainá it'aà ts'e tsojmì xi kínee, mìkii ndaà t̄jín tsà ch'o kit̄so-l̄a x̄it̄a j̄n̄à tsojmì xi jye kàtsjaà-l̄a kjondaà Nainá.” 31 Tanga j̄n̄ò, k'e nga bichioò kò tsà 'yò, n̄it̄a mé kjoa xi 'nè, k'oaá s'ín t'een nga jeya kàt̄ijna Nainá. 32 Kì jé binchaàtsji-l̄a j̄n̄à x̄it̄a judío, kò xi mìtsà x̄it̄a judío, kò j̄n̄à x̄it̄a naxandá-l̄a Nainá. 33 'An, k'oaá s'ín s'iaàn yije koni s'ín sasén-l̄a x̄it̄a xi kj'eíí. Mìtsà jè otsjià ítjoàn xi kjondaà ts'an, jè otsjià ítjoàn kjondaà ts'e x̄it̄a xi kj'eíí mé-ne nga kit̄jokàjiin-ne kjo'in.

11

1 Koni s'ín s'iaàn 'an nga kjingui-l̄a Cristo, k'oa t̄is'ín chjinguì-ná.

Kó s'ín skoexkón x'in-l̄a j̄n̄à íchjín k'e nga chjat'aà-l̄a Nainá

2 Ndí 'ndsè kò tichjaá, ndaà 'nè-nò nga nìkítsjeèn it'aà ts'an ngats'ìi kjoa xi s'iaàn; t̄ikoa nìkitasòn kjot̄ixoma xi 'an kisìkatoya-nò. 3 Tanga mejèn-na nga kàtasijiin-nò nga jngoò l̄jngoò x̄it̄a x'in, jè Cristo xi skò-l̄a ma, kò jè chjoón, jè x̄it̄a x'in xi skò-l̄a ma, koni jè Cristo, jè Nainá xi skò-l̄a ma. 4 Tsà jngoò x̄it̄a x'in xi t̄jtsa skò k'e nga chjat'aà-l̄a Nainá, o

k'e nga chjaya 'én-la Nainá, mìkiì beèxkón Cristo nga jè tíjna sko-la. ⁵ Tanga tsà jngoò chjoón, tsà mìkiì bíjtsa sko k'e nga chjat'aà-la Nainá, o k'e nga chjaya 'én-la Nainá, mìkiì beèxkón x'in-la nga jè tíjna sko-la. K'oaá ngaya-la koni tsà kisijno-la. ⁶ Tsà jngoò chjoón xi majìn-la bíjtsa sko, tìkoaá-ne kàtasijno-la tsja sko. Kò tsà masobà-la nga sijno-la, kàtíjtsa sko. ⁷ Jè xitá x'in, mìkiì tjí'nde nga kùjtsa sko, nga k'oaá s'in 'ya-la koni Nainá, kò it'aà ts'e xitá x'in, 'yaá-la kjoajeya-la Nainá; tanga it'aà ts'e chjoón 'yaá-la kjoajeya-la x'in-la. ⁸ Jè x'in, mìtsà ya itjokát'aà-ne ts'e chjoón; jè chjoón xi it'aà ts'e xitá x'in itjokát'aà-ne. ⁹ Jè xitá x'in, mìtsà kjoa ts'e chjoón kisindaà-ne; tanga jè chjoón, kjoa ts'e x'ín kisindaà-ne. ¹⁰ Koií kjoa-la jè chjoón tjínè-la nga kùjtsa sko, seña-né nga beèxkón x'in-la, mé-ne nga tìkoa skoe-ne jñà àkjale. ¹¹ Tanga koni s'in tjíndaà-la Nà'èn-ná, tsà tsjìn chjoón, mìkiì tíjna x'in; kò tsà tsjìn x'in, mìkiì tíjna chjoón. ¹² Koni s'in komà nga jè chjoón, it'aà ts'e x'ín kisindaà-ne; tìkoaá jè x'in, it'aà ts'e chjoón ts'ìn. Tanga it'aà ts'e Nainá nchrobá yije-ne.

¹³ Jñò, ndaà tìkítsjeèn: ¿A ndaà tjín tsà mìkiì tíjtsa sko jñà íchjín k'e nga chjat'aà-la Nainá? ¹⁴ Tíjé-ne isò'nde, bénojmiya-ná nga kjoasobà-né k'e nga jè xitá x'in síndojo tsja sko. ¹⁵ Tanga ndaà tsejèn k'e nga jngoò chjoón xi ndojò kjoàn tsja sko. Kjoajeya ts'e-né. Koií xá kits'iì-la tsja-la nga ndojò kjoàn, mé-ne nga kùjtsa-ne sko koni tsà payo. ¹⁶ Tsà tjín xitá xi mìkiì tíjngoò ikon koni bixón-jen, k'oaá s'in kàtasijin-la, ngajen kò naxandá-la Cristo, ngui k'oaá s'in 'nè-jen, tsjìn xi kj'eíí s'in.

Kjoa xi mikiì ndaà tjin k'e nga bichiaá koni s'in tsakóya Cristo

¹⁷ Nga tikjiì isa-nò, mikiì ndaà síkítsajna-nò, koií kjoa-la nga mikiì ndaà titsa'nè k'e nga maxkóya; ch'o titsa'nè. ¹⁸ Jè kjoa xi tjna ítjòn ít'aà tsajòn, k'oaá s'in ki'nchre, jño xi naxandá-la Cristo 'mi-nò, k'e nga maxkóya, jò xó ya maà. Mejèn tsà mokjeiin-na tsà koií nachrjein-la tsà k'oaá s'in titsa'nè. ¹⁹ Ta xó k'oaá-la komat'in-nò nga s'eé xita xinguioo xi sijnòya-nò, mé-ne nga jcha-la yá-ne xi tjin-la okixi. ²⁰ K'e nga maxkóya nga bichioò, koni s'in tsakóya Cristo, mìtsà kixi kjoa nga jè nikítsjeèn-yaà koni s'in komat'in Na'èn-ná k'e nga k'en. ²¹ K'e nga bichioò, tjin i'nga xita xi ítjòn kjèn tsojmì xi bi-jchóko; mikiì koña-la xikjin nga tsjá itsé-la; skanda tjin xi mach'i. Tanga jña xita xi i'nga, imaá ijò-la nga mikiì tsjá itsé-la. ²² Jño, ¿a tsjin-nò ni'ya ñánda nga bichioò ko nga 'yò? ¿Mé-ne nachrjekàngui-nò xita naxandá-la Cristo koa nìsobà-là xita ima xi tsjin-la tsojmì xi kine? K'e nga k'oas'in 'nè, ¿kó s'in xán-nò? ¿A ndaà síkítsajna-nò? Majìn, mikiì ndaà síkítsajna-nò.

K'e nga jè Na'èn-ná tsakjèn-ko xita-la k'e nga kòjño

(Mateo 26:26-29; Marcos 14:22-25; Lucas 22:14-20)

²³ Koni s'in tsakóya-na Na'èn-ná, ti koií-ne xi 'an tsakoòya-nò. Jè nitjen k'e nga Na'èn-ná Jesús kit-sobà'ño xita, kiskoé inchrajín, ²⁴kitsjaà-la kjondaà Nainá, ikjoàn kisixkoaya, kitsò: “Chjóé, jè-né xi yijo-na nga titsjaà kjotjò nga kiyá xi kjondaà tsajòn. K'oa ti s'in t'een nga tixkoaya inchrajín, mé-ne

nga s̄ik̄its̄jeèn-nò it'aà ts'an." ²⁵ K'oaá t̄is'in kis'iin k'e nga jye tsakjèn, kiskoé ch̄itsín, kitsò: "Vino xi t̄j̄iya ch̄itsín jè, jè jn̄í-na xi s̄ik̄ix̄iya kjoa x̄itse xi bindaàj̄iìn-kò-nò. J̄ñò, k'e nga ìjngò ìjngò k'a s'ioo, k'oaá s'in t'een mé-ne nga s̄ik̄its̄jeèn-nò it'aà ts'an." ²⁶ K'e nga ìjngò ìjngò k'a k̄ichioò ìnchraj̄ín jè, koa s'ioya vino ch̄itsín jè, it'aà ts'eé kjoabiyaà-la Na'èn-ná k̄inókjoaya, skanda k'e nga kjoí ìjngò k'a Cristo.

Mikì ma taxkì bichikoaá Na'èn-ná

²⁷ N̄ita yá x̄ita-ne xi k̄okj̄en ìnchraj̄ín jè, o xi skoíya ch̄itsín ts'e Na'èn-ná, tsà mìkì skoexkón k'e nga k̄okj̄en, jé t̄ihóts̄ji it'aà ts'e Na'èn-ná nga t̄ihochrj̄engui yijo-la kò jn̄í-la. ²⁸ Koí kjoa-la, ítjòn ndaà t̄ik̄its̄jeèn j̄iìn in̄ima-nò kós'in t̄itsaj̄nakoo Nainá kò x̄ita x̄inguioo. Iskan t̄ichioò ìnchraj̄ín koa t'ioya ch̄itsín ts'e Na'èn-ná. ²⁹ Tsà yá x̄ita xi k̄okj̄en ìnchraj̄ín koa skoí vino xi t̄j̄iya ch̄itsín, tsà mìkì s̄ik̄its̄jeèn nga jè yijo-la Na'èn-ná, x̄ita jè, kjo'íin t̄ibínè-la yijo-la. ³⁰ K'oaá ma-ne k̄j̄in x̄ita x̄inguioo xi ch'in bít'aà-la koa t̄j̄ín xi indaàkjoa t̄itsaj̄na, skanda jye k̄jò k̄j̄in biyaà. ³¹ Tsà ndaà s̄ik̄its̄jeèn kós'in t̄itsaj̄nakoá Nainá kò x̄ita x̄inguiá, Na'èn-ná mìkì kjo'in tsj̄á-ná. ³² Tanga tsà jè Na'èn-ná tsj̄á-ná kjo'in, koi-né nga mejèn-la s̄ik̄ix̄iya-ná mé-ne mìkì k̄okot'aà-ná kjo'in xi mìkì fehet'aà n̄ita k̄jé-ne xi t̄joé-la j̄ñà x̄ita isò'nde xi mìkì beèxkón Nainá.

³³ K'oaá ma-ne j̄ñò ndí 'ndsè k'e nga maxkóya nga bichioò, chíñakjoa-là x̄inguioo. ³⁴ Tsà t̄j̄ín i'nga xi 'ñó ijò-la, t̄ichioò ni'ya-nò, mé-ne k'e nga

ko_xko_ya mi kjo'in tsjá-nò Na'èn-ná. Jñà kjoa xi i'nga xi tjín isa-nò, k'e kìjchokon-nò kíndaajñaá.

12

Kó s'ín tjín kjoa chjine xi tsjá Inima Tsjeè-la Nainá xi kjondaà ts'e naxandá-la

¹ Ndí 'ndsè ko tichjaá, 'an mejèn-na kàtasijiin-nò jñà kjoa chjine xi tsjá Inima Tsjeè-la Nainá.

² Jñò, ndaà tíjiin-nò k'e nga tikj'eè mokjeiín-nò 'én-la Nainá, yaá tsanguit'aà-là xkósòn xi mikii ma chja nga xìn ndiyá kiiko-nò nga mìtsà kixi kjoa nga Nainá. ³ K'oaá xan-nò, niyá xita xi koma kitso-la Jesús: “iCh'o kàtamatin!”, tsà it'aà ts'e Inima Tsjeè-la Nainá tíchja. Tikoáá tsà mìtsà nga'ño ts'e Inima Tsjeè-la Nainá tíchja, mikii koma kitso-la: “iji-né Jesús xi otixomai!”

⁴ Ya ijiin naxandá-la Nainá, kjin skaya kjoa chjine tjín kjoa ts'e xá xi síkitasòn xita, tanga jè xi tsjá kjoa chjine, tijè-ne Inima Tsjeè-la Nainá. ⁵ Jñà xita, kjin skaya xá tjín-la nga siixá-la Na'èn-ná, tanga tijè-ne Na'èn-ná xi maxá-la. ⁶ Kjin skaya nga'ño tjín kós'ín maxá, tanga tijè-ne nga'ño-la Nainá xi síxájiin-la ngats'ii xita. ⁷ Nga jngoò ijngoò xita, tjoé-la jngoò kjoa chjine xi okó nga yaá tijnajiin inima-la Inima Tsjeè-la Nainá mé-ne nga ngats'ii xita naxandá-la Nainá kochjeén-la kjondaà xi tjoé-la. ⁸ Xi it'aà ts'e Inima Tsjeè-la Nainá tjín xita xi 'biil-la 'én xi tjín-la kjo'ítsjeèn; koa tjín i'nga xi 'biil-la 'én xi tjín-la kjoa chjine, nga tijè-ne Inima Tsjeè-la Nainá tsjá. ⁹ Tjín xi tjoé-la kjoachjine nga ndaà mokjeiín-la nga tijè-ne Inima Tsjeè-la Nainá tsjá-la, tikoáá tjín xi tjoé-la

kjoachjine nga síndaà-ne xita xi xk'én, nga tije-ne Inima Tsjeè-la Nainá tsjá-la. ¹⁰ Tjin xi tjoé-la kjoachjine nga ma-la s'in kjoxkón xi ndaà tjin, ko xi ma-la chja ngajo-la Nainá, ko xi machiya-la mé inima xi tísxájiin inima-la xita xi chja. Ko tjin xi tjoé-la nga ma-la chja 'én xi kj'eí tso xi mi yá xita fiya-la, tikoá tjin xi ma-la síkatoya 'én xi kj'eí tso xi mi yá xita fiya-la. ¹¹ Tije ta jngoó-ne Inima Tsjeè-la Nainá xi síxá it'aà ts'e ngats'i kjoa koi nga síka'bí-la nga jngoò ìjngoò xita kjoachjine xi jè mejèn-la nga tsjá-la.

¹² Yijo tsaján, jìn jchán skaya tjin-la; tanga koni s'in tíkjoò, ta jngoò ma-ne yijo. Naxandá-la Cristo, k'oaá tís'in tjin, ta jngoò ma-ne. ¹³ Jñà xi xita judío ko xi mìtsà xita judío, xi xita ch'nda títajna ko xita xi títajnadejí ta jngoò ma-ne. Ngats'iaá jñà, tà ngàsòn komaá bautizar it'aà ts'e xi tije-ne Inima Tsjeè-la Nainá nga jngoò naxandá-la Nainá komaá koni tsà jngoò yijo. Nga jngoò ìjngoáá, Nainá kitsjaà-ná xi tije-ne Inima Tsjeè-la.

¹⁴ Jè yijo-ná, mìtsà tà jngoò skaya tjin-ne; jìn jchán skaya tíkjoòya. ¹⁵ Tsà jè ndsokoaá kitso: “An, mìtsà tsja xita ma, mìtsà ya chjà-na jè yijo.” Mìtsà koi kjoa-la nga okitso nga mi ya chja-ne yijo. ¹⁶ Tsà jñà líká kitso: “An, mìtsà xkon xita ma, mìtsà ya chjà-na jè yijo.” Mìtsà koi kjoa-la nga okitso nga mi ya chja-ne yijo. ¹⁷ Tsà kóhokji yijo-ná, tsà ngui xkoaán koma, ¿kós'in kiná'ya-ná? Tsà jè yijo-ná, tsà ngui líká koma, ¿kós'in kijne-ná? ¹⁸ Tanga Nainá nga jngoò ìjngoò skaya yijo-ná, yaá kisikítajna j'nde-la yijo-ná ñánda nga jè kjòmejèn-la. ¹⁹ Yijo-ná tsà tà jngoò skoya koma, mì-la tsà yijo xi ngui

tíjngò. ²⁰ Kixií kjoa nas'ín kjìn skaya tíkjòya yijo-ná, tanga tajngò ma-ne.

²¹ Jñà xkoaán mìkiì koma kító-là jñà ndsaá: “Mikiì mochjeén-na.” Jè skoaá tíkoaá mìkiì koma kító-là jñà ndsokoaá: “Mikiì mochjeén-na.”

²² Tanga it'aà ts'e yijo-ná, tjín-né xi 'mì-lá nga chiba nga'ño tjín-là tanga isaá ndaà mochjeén. ²³ It'aà ts'e yijo-ná xi 'mì-lá nga mìkiì ndaà tsejèn, jñà-né xi níakjá níkje mé-ne nga isa ndaà kotsejèn-ne. Bíjtsa'ma-né jè yijo-ná, jñà xi mìkiì jí'nde-là nga jcha-là. ²⁴ Mikiì mochjeén nga sijtsa'ma yijo-ná xi tsejèn. Nainá jye k'oas'ín tsibíndaà nga isa ndaà jchaxkón jè xi 'mì-lá nga isa chiba chí-la, ²⁵ mé-ne nga mì kojòya-ne. Tà saá nga jngò ò jngò skaya kàtasíkinda xíkjin. ²⁶ Tsà tjín jngò skaya yijo-ná ñánda ijò ma, ok'ín yije-là xíkjin kóhokji nga ma ijò. Koa tsà tjín ñánda ndaà tíyaxkón, ndaá s'e yije-là kóhokji yijo.

²⁷ Jñò, k'oaá ngaya-là koni yijo-là Cristo. Katjín, katjín xá xi kitjóé-nò ya jjiìn naxandá-là Nainá.

²⁸ Nainá k'oaá s'ín kiskoòsòn-là mé xá xi s'iin xita: jñà títsajna ítjòn xita xi bíxáya-là Nainá; xi ma-ne jò, xita xi chja ngajo-là Nainá; xi ma-ne jàn, xita xi okóya 'én-là Nainá. Tíkoa tjín xi ma-là s'ín kjoxkón xi ndaà tjín. Kò tjín xi ma-là síndaà-ne xita xi xk'én; tjín xi ma-là síchját'aà; tjín xi otíxoma mé kjoa xi koma; kò tjín xi chja 'én xi k'jeí tsò xi mì yá xita fiya-là. ²⁹ Mítsà ngats'ìi nga ma bíxáya-là Nainá. Mítsà ngats'ìi nga Nainá chja ngajo-là. Mítsà ngats'ìi nga ma-là okóya 'én-là Nainá. Mítsà ngats'ìi nga ma-là s'ín kjoxkón xi ndaà tjín. ³⁰ Kò mítsà ngats'ìi nga ma-là síndaà-ne xita xk'én. Mítsà

ngats'ìi nga ma-la chja 'én xi kj'eíi tsò xi mì yá xita fiya-la. Mìtsà ngats'ìi ma-la síkatoya 'én xi kj'eíi tsò xi mì yá xita fiya-la. ³¹ Tanga jñò, mochjeén-né nga tinchátsjioð jñà kjoachjine xi ìsà ndaà tjín.

Tanga j'ndeí 'aán kokoò-nò jngoò ndiyá xi ìsà ndaà tjín kó s'ín sijchá yijo-nò.

13

It'aà ts'e kjoatjòcha

¹ An, tsà ma-na chjà jñà 'én xi kj'eíi tsò xi chja xita nas'ín jñà 'én xi chja àkjale, tanga tsà tsjìn-na kjoatjòcha, nímé chjí-la; k'oaá ngaya-na koni jngoò kicha xi 'ñó one, o koni jñà kicha tsjin xi ch'o one k'e nga kaàkjoð. ² Tsà tsjìn-na kjoatjòcha, nímé chjí-na nas'ín ma-na chjà ngajo-la Nainá, nas'ín machiya yije-na kjoa xi tjí'ma-la Nainá; nas'ín ma yije-na kjoa chjine, nas'ín ndaà mokjeín yije-na it'aà ts'e Nainá, skanda ma-na síkjaníyá-la nindoò. ³ Tsà sika'biá yije tsojmì xi tjín-na nga kòkjen xita ima, koa tsjaà kjotjoà yijo-na nga kiti xi kjondaà ts'e xita xi kj'eíi, tanga tsà tsjìn-na kjoatjòcha, nímé síkijne.

⁴ Jè xita xi tjín-la kjoatjòcha, tjín-la kjoatsetakòn nita mé kjoa-ne; tjín-la kjondaà; mikiì maxitakòn; mìtsà 'én 'nga chja; kò mìtsà tijè ndaà síkijna-ne yijo-la; ⁵ mìtsà taxki s'ín; mìtsà tà kjondaà ts'e ótsji; mikiì taxki majti-la; nímé kjoa bingui takòn; ⁶ mìtsà matsja-la it'aà ts'e kjoa xi ch'o tjín, ts'eé kjoa kixi xi matsja-la. ⁷ Jè xi tjín-la kjoatjòcha, síkjeín yije-la nita mé kjoa-ne, mokjeín yije-la, koña yije-la, chíkjoako yije-la ngats'ìi kjoa.

⁸ Jè kjoatjòcha mìkìl kjoehet'aà. Tanga kijchò nàchrjein nga mì tì yá xi kichja ngajo-la Nainá, nga mì tì yá xi kichja-ne 'én xi kj'eí tsò xi mì yá xita fìya-la kò nga mì tì yá xi tjoé-la kjohítsjeèn xi tjí'ma-la Nainá. ⁹ Nga kj'eè tsà nguì ndaà tíjìin yije-ná kjohítsjeèn xi tjí'ma-la Nainá, kò kj'eè tsà nguì ndaà nokjoà ngajo-lá Nainá. ¹⁰ Tanga k'e nga kijchò nàchrjein nga kjoí xi nímé chijat'aà-la, yaá kjoehet'aà jñà kjoa xi ta chiba machiya-ná.

¹¹ K'e nga sa chítia, k'oaá s'ín kichjà koni chja ixti, k'oas'ín kisikítsjeèn koni s'ín síkítsjeèn ixti, k'oas'ín kiskoòsòn-la koni ixti. Tanga k'e nga jye kòjchínga, kisikíjna-ná kjoa ts'e ixti. ¹² I'ndeí, ta k'oaá s'ín 'yaá Nainá koni tsà chítsín jmà chítsejèn-yaá nga mìkìl ndaà tsejèn-ná. Tanga kijchò nàchrjein k'e nga ndaà kòtsejèn-ná nga chí'aán Nainá. I'ndeí ta chibaá machiya-na, tanga kijchò nàchrjein nga ndaà kochiya-na koni s'ín beèxkon-na Nainá.

¹³ Ján kjoa tjín xi mìkìl kjoehet'aà, jngoò kjoa nga mokjeín-ná ít'aà ts'e Nainá, ìjngoò nga chiñà-lá xi tjoé-ná, ìjngoò nga s'e-ná kjoatjòcha. Jñà ingajàn kjoa koi, jè kjoatjòcha xi ìsa 'ñó chjí-la.

14

Jè xi ma-la chja 'én xi kj'eí tsò

¹ Jè kjoatjòcha tanguítjìngui-là; tìkoa mochjeén-né nga tìnchátsjioò jñà kjoachjìne xi tsjá Iníma Tsjeè-la Nainá. Kò jè xi ìsa 'ñó mochjeén nga kìnókjoa ngajo-la Nainá. ² Jngoò xita xi kj'eí tsò 'én xi chja, mìtsà taxkì xita tíchja-la; Nainá tíchjat'aà-la. Nga mì yá xita fìya-la kó tsò 'én xi tíchja. Jñà 'én xi chja, ts'éé Iníma Tsjeè-la Nainá nga tíchja'ma-né.

³ Tanga jè xita xi chja ngajo-la Nainá, jña xita naxandá-la Nainá chjajijn-la, mé-ne nga isa ndaà koma-la, isa ndaà ko'ñojijn-ne kjohítsjeèn-la koa isa ndaà siije takòn-ne xita naxandá-la Nainá. ⁴ Jè xita xi chja 'én xi kj'eíí tsò xi mì yá xita fiya-la, ti yijo-laá tsjá nga'ño-la. Tanga jè xi chja ngajo-la Nainá, jña xita naxandá-la Cristo tsjá-la nga'ño.

⁵ An, k'oaá s'ín mejèn-na tsà ngats'ioò koma-nò kinókjoaa 'én xi kj'eíí tsò xi mì yá xita fiya-la. Tanga isaá-la ndaà tjín tsà koma-nò kinókjoaa ngajo-la Nainá. Jè xi Nainá chja ngajo-la isaá 'ño chjí-la mì k'oa-ne koni jè xi chja 'én xi kj'eíí tsò. Ta jngoó-la tsà tjín xita xi koma-la siikatoya 'én xi kj'eíí tsò mé-ne isa ndaà s'e-la nga'ño xita naxandá-la Cristo.

⁶ Ndí 'ndsè ko tichjaá k'oaá ngaya-la tsà 'an mejèn-na kjíkon-nò, tsà kj'eíí tsò 'én xi kichjàko-nò xi mìkii na'yà-là, kós'ín kochjeén-nò. Ta jé-la tsà 'én-la Nainá sikíchiya-nò, tsà kènojímí chiba-nò kjohítsjeèn xi ndaà tsò, tsà kichjàjijn-nò 'én kixi, ko kokoòya-nò 'én xi ndaà tsò.

⁷ Jña chrjo-la música ko ní'ño xi tíhone tsà ngásòn kjone, ¿kós'ín jcha-la ñá-laá xi tíhone nga tà ngásòn tsò? ⁸ Tsà jè chrjo trompeta-la xita kjojchán, tsà mìkii ndaà skindaya, ¿yá xita xi kítsajnandaà nga kjoí kjojchán? ⁹ Jño, k'oaá tís'ín mat'ioòn tsà mìtsà 'én tsajòn kinókjoaa nga kjiya-la xita, ¿kó s'ín kiná'ya-la mé 'én xi titsanokjoà? Tà ijijn isén-la titsanokjoà. ¹⁰ Kjin jchán skoya 'én tjín nga tíjtsa isò'nde, tanga ngats'ii 'én tjín-la kjohítsjeèn kó tsòya-ne nga jngoò ijngoò skoya. ¹¹ An, tsà mìkii fiya-na kó tsò 'én xi tíchja jngoò xita, xita xìn nan-guú koma-na. Ko jè xita xi tíchja, k'oaá ti koma-la

it'aà ts'an koni xìn nanguí i'nde-na. ¹² Jñò, nga mejèn-nò jñà kjoachjine xi tsjá Inima Tsjeè-la Nainá, mochjeén-né nga isa ndaà tinchátsjioò jñà kjoachjine xi koma ndaà sichját'aà-la naxandá-la Cristo mé-ne nga isa tse nga'ño s'e-la.

¹³ K'oaá ma-ne jè xita xi k'ejí tsò 'én xi chja xi mì yá xita fiya-la, katasíjét'aà-la Nainá nga kátatsjá-la kjoachjine mé-ne koma sùkatoya-ne 'én xi chja. ¹⁴ 'An, k'e nga chját'aà-la Nainá nga k'ejí tsò 'én xi tichjà xi mìkì fiya-na, tà jè tichja Inima Tsjeè-la Nainá xi tijnajìin inima-na. Tanga jè kjohítsjeèn-na, nimé kjondaà sakò-la nga mìkì fiya-na kó s'ín tichjà. ¹⁵ 'An, ¿mé xi s'iaàn? Mochjeén-né nga kichját'aà-la Nainá 'én xi bíjìin inima-na Inima Tsjeè-la Nainá. Tikoáá mochjeén-né nga kichjàkoáa Nainá 'én xi ndaà fiya-na. K'e nga seè, tikoáá mochjeén-né nga seè sò xi bíjìin inima-na Inima Tsjeè-la Nainá. Tanga tikoáá mochjeén nga seè sò xi ndaà fiya-na. ¹⁶ K'e nga jeya nìkìjni Nainá, tsà tà jñà 'én nokjoì xi bíjìin inima-lè Inima Tsjeè-la Nainá, tsà kji'nchré-la 'én-lè jñà xita xi mìkì fiya-la, mìkì koma kitso: “K'oaá s'ín kàtama”, nga mìkì fiya-la kó tsò 'én xi nokjoì. ¹⁷ Okixi-né, kjondaà xi ti'biì-la Nainá, ndaà tjin, tanga jñà xita xi i'nga, nì mé nga'ño tísakó-la nga mìkì fiya-la. ¹⁸ 'An, tsjaà-la kjondaà Nainá nga isaá ndaà ma-na chjà 'én xi mì yá xita fiya-la mì k'oa-ne koni jñò. ¹⁹ Tanga k'e nga ya tijnajìin-la xita naxandá-la Cristo, isaá ndaà tjin tsà tà 'òn 'én kichjà xi tjin-la kjohítsjeèn nga kokoóya-la xita, mì k'oa-ne tsà te jmiì 'én kichjà xi k'ejí tsò xi mìkì 'nchréya-la xita.

20 Ndí 'ndsè kò tichjaá, kì k'oaá s'ín nìkítsjeèn koni ixti. Tanga ts'e kjoa xi ch'o tjin, k'oaá s'ín t'een koni ixti xi kj'eè ndaà machiya-la. Tanga it'aà ts'e kjohítsjeèn-nò, k'oaá s'ín t'een koni xita xi jye ndaà machiya-la. 21 Xojon-la Nainá k'oaá s'ín tichja nga tsò: “Nga kichjà-la naxandá-na, xita xìn nanguii sikkjeén xi kj'eí 'én chja nga koma kichja-la. Tanga nas'ín k'oas'ín s'iaàn mikì kji'nchréñjon-na, tsò Na'èn-ná.” 22 K'e nga nokjoá 'én xi kj'eí tsò xi mì yá xita fiya-la, kjoxkón okó-la Nainá jña xita xi mikì mokjeiin-la, mìtsà ts'e xita xi mokjeiin-la. Tanga k'e nga nokjoà ngajo-lá Nainá, ts'eé xita xi mokjeiin-la, mìtsà ts'e xita xi mikì mokjeiin-la. 23 Jña xita naxandá-la Cristo k'e nga maxkóya, tsà ngats'iì nga kj'eí 'én kichja xi mì yá xita fiya-la, tsà kjoahas'en jngò xita xi taxki xita xi mikì mokjeiin-la 'én-la Nainá, kitsò-né: “Jña xita koi, xita ská-né.” 24 Tanga tsà ngats'ioò nga 'én-la Nainá titsanokjoáya ngajo-lá, tsà kjoahas'en jngò xi taxki xita xi mikì mokjeiin-la 'én-la Nainá, k'e nga kji'nchré-nò, kokjeiin-la kò kochiyaá-la nga xita jé-né. 25 Jè kjoa xi tjna'ma ijìn inima-la, jchaá-la; kò jè xita, kosijna-xkó'nchi-la Nainá nga skoexkón; kokjeiin-la nga kixi kjoa nga ya tjnajìn-nò Nainá.

Okixi xi kitsjaà Pablo kó s'iin xita k'e nga maxkóya nga jeya síkijna Nainá

26 Jñò ndí 'ndsè kò tichjaá, kó s'ín fiya-nò jña 'én koi? Tsòyaá-ne, k'e nga maxkóya nga jeya nìkijna Nainá, tjin i'nga xita xinguioo xi seè-la Nainá; tjin i'nga xi ma-la okóya 'én-la Nainá; tjin xi ma-la bénojmi 'én xi jye tsakó-la Nainá; tjin xi chja 'én xi kj'eí tsò xi mì yá xita fiya-la; tikoáá tjin xi

ma-la síkatoya 'én xi kj'eíí tsò. Ngats'ii xá koi, k'oaá s'ín kàtabitasòn mé-ne nga isa ndaà s'e-la nga'ño inima-la jña xita naxandá-la Nainá. ²⁷ Tsà tjín xita xi ma-la chja 'én xi kj'eíí tsò xi mì yá xita fiya-la, tà jò kò tsà jàn kichja; tanga ta ìjngoò ìjngoò kichja; kò jngoò xi síkatoya 'én koi. ²⁸ Tsà tsjìn xita xi ma-la síkatoya, tà jyò kàtìtsajna nga nguixkon naxandá-la Cristo, tìkooá-ne tà jjiìn inima-la kàtichjako Nainá. ²⁹ K'oaá tìs'ín tjín ts'e xita xi chja ngajo-la Nainá, tà jò-ne kò tsà jàn xi kichja. Jña xita xi i'nga, tà kji'nchré-né; ta sùngásòn-kjoò-né a ndaà tjín, o xi majìn-né. ³⁰ Jña xita xi tìtsajna, tsà kitjokàjììn jngoò xita xi Nainá sùkichiya-la 'én xi mejèn-la nga kichja, jè xita xi tíchjaya tìkooá-ne ta jyò kàtìjna, kàtatsjá'nde-la nga jè kàtichja. ³¹ K'oaá ma-ne, ngats'ioò xi ma-nò nokjoà ngajo-la Nainá komaá kìnókjoaa nga ìjngoò ìjngoò-nò mé-ne nga isa ndaà koma-nò kò isa ndaà kotsja-nò ngats'ioò. ³² Jña xita xi ma-la chja ngajo-la Nainá, mochjeén-né nga tijnà skósòn-la kós'ín kichja. ³³⁻³⁴ Nga Nainá, jè xi mejèn-la nga s'e kjoa'nchán, majìn-la nga kjoasii s'e.

Jña íchjín, jyò kàtìtsajna, koni ma ngats'ii naxandá-la Cristo ñánda maxkóya xita-la; mìkii tji'nde nga kichja; ndaà kàta'nchréñijon koni s'ín tíchja kjotíxoma. ³⁵ Tsà mé kjoa xi mejèn-la nga skoe, yaá ni'ya-la kàtakjònangui-la x'in-la. Mikiì ndaà tjín tsà jngoò chjoón kichjajììn ñánda maxkóya xita naxandá-la Nainá.

³⁶ ¿A k'oaá s'ín nikítsjeèn nga ta it'aà tsajòn kisin-daà 'én-la Nainá? ¿A k'oaá ma-nò tsà ta jñò-nó xi kitjoé-nò? ³⁷ Tsà tjín i'nga xita xinguiòo xi

k'oas'ín síkítsjeèn nga ma-la chja ngajo-la Nainá, o xi ndaà machiya-la kjohítsjeèn-la Inima Tsjeè-la Nainá, k'oas'ín kàtakixiya-la nga jña 'én xi tikjiù-nò, kjotíxoma ts'eé Na'èn-ná. ³⁸ Tsà tjín xita xi mìkiì sasén-la koni s'ín okoòya-nò, tikoaa Nainá mìkiì sasén takòn xita jè.

³⁹ Ndí 'ndsè kò tichjaá, k'oaá s'ín 'ñó tinchátsjioè nga tinókjoa ngajo-la Nainá; tanga kì bìtsajna ikòn-là jña xi ma-la chja 'én xi kj'eíí tsò xi mì yá xita fiya-la. ⁴⁰ Tanga ngats'ìi kjoa koi, nguì ndaà t'een, kixi tanguíkoo.

15

K'e nga jaáya-la Cristo

¹ I'ndeì ndí 'ndsè kò tichjaá, 'an mejèn-na nga síkítsjeèn-nò jè 'én ndaà-la Nainá xi kjoa ts'e Cristo xi 'an kichjàyajiìn-nò xi kichjoétjò kò nga kixi títsajnakoo. ² Jè 'én ndaà-la Nainá xi kjoa ts'e Cristo xi koma kochrjejiìn-nò kjo'in tsà kixi títsajnakoo skanda i'ndeì koni s'ín nga kichjàyajiìn-nò nga tisa ítjòn; tsà majìn, nímé chjí-la nga kòkjeiìn-nò.

³ Jè kjoa xi isa 'ñó tjín, jè-né nga kos'ín tsakoòya-nò koni tjín xi 'an kitjoé-na, nga jè Cristo k'en ngajo-ná xi kjoa ts'e jé-ná nga k'oaá s'ín tíchja Xojon-la Nainá; ⁴ nga kisihijiìn, koa nga ijchò jàn nàchrjein jaáya-la, koni s'ín tíchja Xojon-la Nainá. ⁵ K'e nga jaáya-la, tsakó-la yijo-la jè Cefas [tijè-ne Pedro], ikjoàn tsakó-la yijo-la jña xita-la xi i'nga, ya tejò ma-ne kò Pedro. ⁶ Xi komà iskan, tsato 'òn sindo ma-ne xita 'ndsè xi títsajnajtín nga tsakó-la yijo-la. Jña xita koi, tjín i'nga xi jye k'en, tanga kjìn ma xi tákó títsajnakon skanda i'ndeì. ⁷ Ikjoàn

tsakó-la yijo-la jè Jacobo. Xi komà iskan tsakó yije-la yijo-la jñà xita-la xi tsibíxáya-la.

⁸ Xi jye het'aà-ne, ikjoàn 'aán tsakó-na yijo-la. 'An, k'oaá s'ín ngayá-la koni tsà ingoò ki'ndí xi mì jé nachrjein kits'iìn koni s'ín chíya nachrjein-la.

⁹ 'An-ná xi isa 'ñó nangui tijná-la kóhotjín jñà xita xi tsibíxáya-la Jesús. Skanda mìkiì ok'in-na nga k'oas'ín k'oín-na; nga 'aán kiitjinguì kondra-la jñà xita naxandá-la Cristo. ¹⁰ Tanga jè kjondaà-la Nainá ndaà tsasikó-na; k'oaá komà-ne nga 'an tsibíxáya-na. Jè kjondaà-la, mìtsà tà kjoatjò kits-jaà-na. Tanga 'an, isaá 'ñó kisixá mì k'oa-ne koni ngats'iì xita-la xi i'nga. Kixií kjoa, mìtsà nga'ñó ts'an, kjondaà ts'eé Nainá. ¹¹ Tsà 'an-ná, kjo tsà jñà xita-la xi i'nga xi ndaà síxá, tanga jè xi chjí-la nga k'oa s'ín nokjoàya-jen, kjoa jñò, k'oaá s'ín mokjeiín-nò.

K'e nga kjoaáya-la jñà xita xi jye k'en

¹² K'oaá s'ín tinokjoáya nga jè Cristo jaáyajiìn-la xita xi jye k'en, tanga, imé-ne tjín i'nga-ne xita xinguiòò xi tsò: “Jñà xita xi jye k'en mì tì kiì kjoaáya-la.”? ¹³ Tsà mìkiì kjoaáya-la xita xi jye k'en, tikoáá jè Cristo, mì-la tsà kixi kjoa nga jaáya-la. ¹⁴ Tsà mìkiì jaáya-la Cristo, jñà 'én xi nokjoàya-jen nimé-la chjí-la, tikoáá nimé-la chjí-la koni s'ín mokjeiín-nò. ¹⁵ Tikoáá ngajen, xita ndisoó kítojokàngui-jen it'aà ts'e Nainá, nga k'oaá s'ín nokjoàya-jen 'én-la Nainá nga bixón-jen: “Jè Nainá kisikjaáya-la Cristo.” Nga tsà jñà mìk'en mìkiì kjoaáya-la, mì-la tsà kixi kjoa nga kisikjaáya-la Cristo. ¹⁶ Tsà jñà xita xi jye k'en mìkiì kjoaáya-la, tikoáá jè Cristo mì-la tsà kixi kjoa nga jaáya-la.

17 Jè Cristo, tsà mìkìì jaáya-la, nímé-la chjí-la koni s'ín mokjeiín-nò ìt'aà ts'e, tákó yaá-la títajnañòò jé-nò. 18 Tíkooá jñà xítà xi jye k'en nga kòkjeiín-la ìt'aà ts'e Cristo, jngoò k'aá-la kichijà, tsà mì jaáya-la Cristo. 19 Jè kjoa xi chiñà-lá ìt'aà ts'e Cristo, tsà tà íí isò'nde kjoehet'aà, jñá-la xi nguì xítà imà 'mì-ná kó ngats'ìì xítà xi tjín isò'nde.

20 Tanga nguì kixíì kjoa nga jè Cristo jaáyaá-la ìt'aà ts'e kjoa biyaà. K'oaá ngaya-la koni tsojmì xi majchá ítjòn, nga jè Cristo jaáya ítjòn-la ngats'ìì xítà xi iskan kjoaáya-la [nga mì tì kii kiyá-ne]. 21 Koni s'ín komà nga ìt'aà ts'e jngoò xítà kjòts'ia nga biyaà xítà, k'oaá tìs'ín komà nga ìt'aà ts'e jngoò xítà j'ìì nga kjoaáya-la xítà xi jye k'en. 22 Koni s'ín ma nga biyaà ngats'ìì xítà xi ìt'aà ts'e tje-la Adán kits'iín, k'oaá tìs'ín ma nga kjoaáyaá-la ngats'ìì xítà xi ìt'aà ts'e Cristo ts'iín xitse-ne. 23 Tanga jngoò ìjngoò 'ncha ndiyá-né nga kjoaáya-la koni s'ín oko-la. Jè Cristo, tíjna ítjòn nga jaáya-la; k'e nga kjoíì ìjngoò k'a Cristo, k'eé kjoaáya-la xi xítà ts'e. 24 Cristo, ítjòn sùkjesòn ngats'ìì xi kondra fì-la, ngats'ìì xi títajna ítjòn, xi tjín-la nga'ñó kò xi otíxoma. Ikjoàn jè Cristo sùngatsja kjotíxoma-la Nainá xi Na'èn-ná ma; k'eé kjoehet'aà isò'nde. 25 Mochjeén-né nga jè Cristo kàtatíxoma skanda k'e nga jye sùkítsajngui yije ndsokò jñà xi kondra-la. 26 Kò jè kondra-la xi fehet'aà-ne nga chija, jé kjoa biyaà. 27 Nítà mé xi tjín, Nainá, yaá kisikítsajngui yije ndsokò Cristo. Jè tíhotíxoma yije-la. Tanga mitsà tsò-ne kjoa nga jè Nainá, yaá tíjngui ndsokò Cristo. Nga jè sobá Nainá xi kisikítsajngui ndsokò nítà mé xi tjín. 28 K'e nga jye ya títajngui yije ndsokò Cristo

n̄it̄a mé xi t̄jín, jè Cristo, nga Ki'ndí-la Nainá ma, t̄ikoáá nangui s̄ik̄ijna yijo-la nga nguixkon Nainá nga jè sobà Nainá tsibítsajnangui ndsok̄o Cristo n̄it̄a mé xi t̄jín, mé-ne nga jè Nainá jngoò k'aá jè k̄ijna ít̄jòn-la n̄it̄a mé kjoa-ne.

²⁹ Tanga tsà j̄ñà x̄it̄a xi jye k'en mì t̄i kii kjoaáya-la, j̄ñà x̄it̄a xi ít'aà ts'e mik'en ma-ne bautizar, ¿kó s'ín síkítsjeèn? ¿Mé-ne ít'aà ts'e mik'en ma-ne bautizar, tsà kixi kjoa nga mì t̄i kii kjoaáya-la x̄it̄a? ³⁰ Kò ngajen, ¿mé kjoa-ne nga nachrjein nchijòn binchaxkón-lajen yijo-najen, tsà mì t̄i kii kjoaáya-la x̄it̄a? ³¹ Ndí 'ndsè kò tichjaá, k'oaá xan-nò nga nguì kixi kjoa nga nachrjein nchijòn t̄jín-na kjoxxkón tsà ya kiyá, koni s'ín nga nguì kixi kjoa nga matsja-na ít'aà tsajòn nga ngásòn mokjeiín-ná ít'aà ts'e Na'èn-ná Jesucristo. ³² Tsà tà j̄ñà kjoa ts'e isò'nde-né nga kiskaàn-koaa x̄it̄a koni tsà xa ján Éfeso, ¿mé xi kisikijne? Tsà j̄ñà x̄it̄a xi jye k'en mì t̄i kii kjoaáya-la, t̄ikoáá-ne: “Kichiaá, s'ioáá nga nchijòn-lè kiyá-ná.”

³³ Kì yá x̄it̄a xi konachan-nò ít'aà ts'e kjoa koi. Nga t̄jín jngoò 'én xi tsò: “J̄ñà x̄it̄a xi tsjahijtakoáá xi mìkii ndaà s'ín, j̄ñà síkíts'ón-j̄iìn kjoa xi ndaà t̄jín koni s'ín titsan̄ijchá yijo-ná.” ³⁴ Ndaà t̄ikítsjeèn ít'aà ts'e kjoa koi; k̄i tà tsjaà jé binchaàtsjioò. Nga t̄jín i'nga x̄it̄a xinguiòo xi mìkii beèxkon Nainá. K'oaá xan-nò mé-ne nga kàtasobà-nò.

Kó kjoàn koma mik'en k'e nga kjoaáya-la

³⁵ Tsà koi nachrjein-la t̄jín i'nga x̄it̄a xi tsò: “¿Kós'ín koma nga kjoaáya-la x̄it̄a xi jye k'en? ¿Kó kjoàn yijo xi k̄it̄jokàj̄iìn-kò?” ³⁶ ¿Mé tà tònò-nò! K'e nga 'bè t̄jè, j̄ñà nojmé nga sihiij̄iìn, biyaà-né, mé-ne

nga kiso xitse-ne jno, nga ìjngoò k'a kítsajnakon. ³⁷ K'e nga 'bè tje, mìtsà jñà xi jye jno bitjee; tà jñà nojmé bitjee, o xi trigo-né. ³⁸ Tanga jè Nainá, k'oaá kjoàn s'ín koni s'ín mejèn-la; k'oaá kjoàn s'ín nga jngoò ìjngoò skaya xojmá koni kjoàn tje-la. ³⁹ Jñà yijo, mìtsà ngàsòn kjoàn. Yijo-la xita, kj'eíí kjoàn; yijo-la cho, kj'eíí kjoàn; yijo-la tìn, kj'eíí kjoàn; yijo-la nise, kj'eíí kjoàn. ⁴⁰ Koni choòn ì isò'nde nga tjín yijo xi kj'eíí s'ín tsejèn, k'oaá ti choòn ngajmì nga tjín xi kj'eíí s'ín tsejèn. Mìtsà ta ngàsòn tsejèn xi tjín ngajmì ko xi tjín isò'nde. ⁴¹ Jè ts'óí kj'eíí s'ín tsejèn, jè sá kj'eíí s'ín tsejèn, jñà ni'ño kj'eíí s'ín tsejèn. K'a kj'eíí, k'a kj'eíí s'ín tsejèn nga jngoò ìjngoò skoya.

⁴² K'oaá tis'ín ma nga kjoáaya-la xita xi jye k'en. Jè yijo xi sihiijn, bits'on-né, tanga jè yijo xi kjoáaya-la, mì tì kù kíts'ón-ne. ⁴³ Sihijìn-né xi nímé chjí-la; jè xi kjoáaya-la jeya-né. Xi sihiijn, yijo indaà-né; xi kjoáaya-la tjín-la nga'ño. ⁴⁴ Jè yijo xi sihiijn, taxki yijo-né, ts'e isò'nde-né. Yijo xi kjoáaya-la, yijo xitse-né, ts'eé Inima Tsjeè-la Nainá. Tjín xi taxki yijo, tikoá tjín xi tsjá Inima Tsjeè-la Nainá.

⁴⁵ K'oaá s'ín tíchja Xojon-la Nainá nga tsò: “Jè xita x'in tjòn xi k'i'mì Adán, jngoò xi xita komà xi tsibijnakon.” Tanga [jè Cristo], jngoò inima xi síkítsajnakon xita, nga jè j'ì ngajo-la Adán nga jyehet'aà-ne kjoá. ⁴⁶ Tanga jè xi inima, mìtsà jè j'ì itjòn; jè j'ì itjòn xi taxki yijo ts'e isò'nde, iskaán j'ì xi inima. ⁴⁷ Jè xita x'in xi tjòn, ì it'aà nangui ts'e; ni'ndeé kisindaà-ne. Jè xita x'in xi ma-ne jò, ngajmì ts'e, yaá inchrobà-ne, [nga jè xi Na'èn-ná].

48 Ngats'iì xita xi i isò'nde ts'e, k'oaá kjoàn yijo-la koni kji ts'e Adán nga ni'ndeé kisindaà-ne. Ngats'iì xi ngajmii kítsajna, k'oaá kjoàn koma yijo-la koni kji ts'e Cristo xi ngajmii inchrobà-ne. 49 I'ndeì, jñá, k'oaá kjoàn tsejèn yijo-ná koni kji xi ni'nde kisindaà-ne; nga komà iskan, k'oaá kjoàn kotsejèn yijo-ná koni kji xi ngajmii j'iì-ne.

50 Ndí 'ndsè, k'oaá xan-nò jè yijo-ná nga jní tjín-la mìkii ma kjoahas'en-jìin ñánda tíhotíxoma Nainá. Tíkoaá jè yijo-ná xi bi'ndoya mìkii ok'in-la nga ya kjoahas'en-jìin ñánda tjín xi mìkii bi'ndoya. 51 Kènojmi jngoò-nò kjoa'ma ts'e Nainá: Jñá xi xita-la Cristo 'mì-ná, mìtsà ngats'iaá nga kiyá, tanga ngats'iì-ná ta jngoò tjo kjoatjìya-ná, 52 k'oaá ngaya-la koni k'e nga tsíx'aá koa bíchjoà xkoaán, tik'eé-ne nga skìndàya chrjo trompeta xi fehet'aà-ne. K'e nga kjone chrjo trompeta, jñá mik'en kjoaáya-la, mì tì kii kì'ndo-ne nita kjé-ne. Koa jñá kjoatjìya-ná. 53 Jè yijo-ná nga biyaà ko nga bi'ndo, mochjeén-né nga tjoé jngoò-la yijo xi mì tì kii kiyá-ne ko mì tì kii kì'ndo-ne nita kjé-ne. 54 K'e nga k'oas'ín koma nga jè yijo-ná tjoé jngoò-la yijo xi mì tì kii kiyá-ne ko mì tì kii kì'ndo-ne nita kjé-ne, k'eé kítasòn koni s'ín tíchja Xojon-la Nainá nga tsò: “Jè kjoa xi síkijne jngoò k'aá síchija kjoabiyaà. 55 Ji xi kjoa biyaà 'mì-lè, ¿ñánda-ne nga kinìkijni? ¿Ñánda tíjna na'yá-lè xi ma-la sík'en xita?” 56 Jè na'yá xi tjín-la kjoa biyaà, jé kjoa ts'e jé. Ko jè nga'ño xi tjín-la jè kjoa ts'e jé, jé kjoatíxoma. 57 Ndaà chjí-la Nainá nga jè tsjá-ná nga'ño xi it'aà ts'e Jesucristo xi otíxoma-ná nga nìkijne-lá kjoa biyaà ko kjoa ts'e jé.

⁵⁸ Jñò ndí 'ndsè xi matsjake-nò, kixi tìtsajna. Niyá xi sìkijatjya-la kjohítsjeèn-nò. Kjit'aà nàchrjein isa 'nó tixá-là Na'èn-ná. Nga tíjìn-nò nga jè xá xi 'nè xi ts'e Na'èn-ná, mìtsà tà kjotjò.

16

Ton xi maxkót'aà-la jñà xita naxandá-la Cristo

¹ Jè ton xi maxkót'aà-la xita naxandá-la Cristo, k'oas'ín t'een koni s'ín kixan-la xita naxandá-la Nainá ján nangui Galacia. ² Jñò, nga jngoò ijngoò, nga jìin jìin nàchrjein k'e nga tahàngo, titjò chiba ton-nò koni s'ín machikon-t'ioòn, mé-ne nga mì k'e kíxkó-nò k'e nga 'an xi kìjchoa. ³ K'e nga kìjchokon-nò ya Corinto, sikasén ján Jerusalén xita xi jñò chjaajñòò. Tsjaà-la xojon carta nga kjiko jè ton xi maxkót'aà-nò. ⁴ Tsà mochjeén nga tìkoa 'an kjíán, komaá kjiko-na jñà xita koi.

K'e nga kisikítsjeèn Pablo nga kjoì ján Corinto

⁵ Mejèn kjíkon-nò k'e nga jye kjoáhatoaa ján nangui Macedonia, nga k'oaá s'ín tjíndaà-na nga ya kjoáhatoaa mé-ne nga ikjoàn kìjcho-na Corinto. ⁶ Tsà koma ya kótijnako chiba nàchrjein-nò, kò tsà koií nàchrjein-la nga ya kótijnako-nò skanda k'e nga kjoehet'aà nàchrjein-la chon 'nchán, mé-ne jñò koma sìchját'aà-ná k'e nga tsà ñánda kjíán nga koma iskan. ⁷ Majìn-na nga tà jngoò tjò skotsejèn-nò; jè xi mejèn-na nga kìn nàchrjein kótijnako-nò, tsà Nainá mejèn-la nga tsjá'nde-na. ⁸ Íí kótijna naxandá Éfeso skanda nàchrjein ts'e s'eí Pentecostés, [jè s'eí xi bitjo k'e nga jye bijchó icháte nàchrjein nga bitjo s'eí Paxko]. ⁹ Ndaà títjo'nde-na

nga tìs'iaàn xá-la Nainá xi 'ñó ndaà tíbitasòn, nas'ín 'nó kjin ma-ne xita xi kondra títsajna-na.

¹⁰ Tsà kijchòkon-nò jè Timoteo, chítsejèn-là nga tsja kàtas'e-la nga kíjnakò-nò nga mì yijo-la kinchaxkón-la, nga tikoá xá-la Nainá tís'ín koni 'an. ¹¹ K'oaá ma-ne, kì nachrjenguioò jñò, ta saá tichját'aà-là nga 'nchán kàtjanchrobákon-na; 'an, tíkoñaá-la kò xita 'ndseé xi i'nga.

¹² 'An 'nó tsibìtsi'ba-la jè 'ndsè Apolos, nga katahijtakò jña xita 'ndseé xi tjinè nga kjikon-nò, tanga majìn-la nga fi; k'eé-la kjoì k'e nga kò'a-la.

¹³ Ndaà titsajnakon. 'Ñó kixi titsajnakoo jè 'én xi mokjeiín-nò. Kì yá xi tsakjoòn-là, kàtas'e-nò nga'ño. ¹⁴ Ngats'ìi kjoa xi 'nè, koo kjoatjòcha-nò k'oa t'een.

¹⁵ Jñò ndí 'ndseé kò tichjaá, jyeé tíjìn-nò nga jña xita ni'ya-la Estéfanos, jña kòkjeiín ítjòn-la 'én-la Cristo ya nangui Acaya. Jña xita koi, k'oaá s'ín bínè-la yijo-la nga jña xita naxandá-la Cristo slichját'aà-la. ¹⁶ Ndí 'ndsè, bìtsi'bà-nò nga tiná'yañijon-là xita xi k'oas'ín síxá koni jña xita koi, kò ngats'ìi xita xi mìkì bijta-la nga síxá-la Nainá.

¹⁷ Matsja-na nga j'ìikon-na Estéfanos, Fortunato kò Acaico [nga jñò kinikasén], nga jña j'ìi síkitasòn xi jñò mìkì komà kinìtasòn nga inchrobàchon-ná.

¹⁸ Jña j'ìi síje ikon-na kò tsajòn. K'oaá ma-ne jchaxkón jña xita xi k'oas'ín s'ín koni jña xita koi.

Pablo síhixat'aà naxandá-la Cristo

¹⁹ Jña naxandá-la Cristo xi títsajna nangui Asia síhixat'aà-nò. Jè Aquila kò Priscila kò xita naxandá-la Cristo xi bixoña ya ni'ya-la, it'aà ts'e Na'èn-ná ndaà síhixat'aà-nò. ²⁰ Ngats'ìi xita 'ndseé,

síhixat'aà-nò. Jñò t̄ixat'aà nga jngoò ìjngoò x̄ita xinguīo nga ko in̄ima-nò.

²¹ 'An, xi Pablo 'mì-na, tisìhixat'aà-nò nga ko ndsaa tikjì-nò xojon jè.

²² Tsà t̄jín x̄ita xi mìkì matsjakeè Jesucristo xi otíxoma-ná, jè x̄ita neí kàtjìko. Na'èn, jì n̄iton nchroboí.

²³ Jè kàt̄ijnako-nò kjondaà-la Jesucristo xi otíxoma-ná. ²⁴ Kjit'aà načrjein kàtas'e-nò kjoatjòcha-na nga jè Cristo Jesús titsajnaoá. K'oaá s'ín kàtama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0